

# Inuit innarluutillit tapersorsorneqarnissaannut Inatsisartut inatsisaat

## Kapitali 1

*Aalajangersakkat aallarniutaasut*

*Siunertaq aamma siunertarineqartut*

### § 1. Inatsisartut inatsisaanni matumani siunertaavoq:

- 1) innarluuteqarnerup malitsigisaanik ajornartorsiutit pillugit inuit innarluutillit siunnersorneqarnissamik tapersorsorneqarnissamillu neqeroorfigineqarnissaannik qulakkeerinniffigineqarnissaat,
- 2) inuup imminut ikorsinnaanissaanik siuarsaneq imaluunniit ulluinnarni inuuneranik oqilsaassineq kiisalu inuunerinnerulersineq,
- 3) inuup innarluutillip ineriaartorsinnaanissaanik aamma piginnaasai naapertorlugit nammineq periarfissaqarfniik atorluaasinnaanernik siuarsaneq, matumani inummut ataasiakkaamut tamanna periarfissaappat, ilinniagaqarnermik periarfissaq ilanggullugu,
- 4) inuit innarluutillit inuiaqatigiinni naligiimmik periarfissaqarnissaasa aammalu innarluuteqarneq pissutigalugu assigiinngisitsinerup akerlilerneqarnissa tamatumuunalu sapinngisamik inuiaqatigiinni tamakkiisumik sunniuteqarluartumillu peqataanissaasaakuunissaasalu qulakkeerneqarnissa, aamma
- 5) ataasiakkaat ilinniarnissaannut sulisinnaanissaannullu periarfissat siuarsarnissaat.

**§ 2. Inuk innarluutilik allat assigalugit inuit pisinnaatitaaffiinik aamma tunngaviusumik kiffaanngissuseqarsinnaatitaanerannik tamaginnik tamakkiisumik ilorrisimaaruteqarsinnaatitaavoq.**  
Inatsisartut inatsisaat manna malillugu tapersiineq pisinnaatitaaffiinik taakkuninnga qulakkeerinneqataassaaq.

*Imm. 2. Inuup innarluutillip pissusissamisoortumik ataqqinassusaa, inuttut nammineersinnaanera, matumanilu kiffaanngissuseqarluni aalajangiisinnaanera inunnillu allanik attuumassuteqannginnera ataqqillugu, Inatsisartut inatsisaat manna malillugu tapersersuineq pissaaq.*

**§ 3. Inuk innarluutilik ataqtigii sagaasumik, ataqtigii sumik tamakkiisumillu isiginnittumik, inummut tunngasut tamaasa aamma inuup inuunera mianeralugit, tapersorsorneqarnissaminut pisinnaatitaavoq.**

*Imm. 2. Inunnut ataasiakkaanut pitsaanerusussaq anguniarlugu ataatsimut naliliineq aallaavigalugu Inatsisartut inatsisaat manna malillugu aalajangiinerit pissapput.*

*Imm. 3. Pissutsit inummut innarluutilimmut tunngassuteqartut pillugit sapinngisamik inuup innarluutillip nammineq isumai innimigineqassapput nammineerlunilu piginnaasai ineriaartorneranilu killiffia*

pissusissamisoortumik qajassuunneqassallutik.

**§ 4.** Inuup innarluutillip, aamma inummut taassumunnga angajoqqaatut sinniisusup imaluunniit angajoqqaatut akisussaasut kissaatigippassuk, inuk innarluutilik angerlarsimaffimminiiginnarnissaminut tapersorsorneqarnissaminik pisinnaatitaaffeqarpoq. Taamaaliorzinnaanissamat nammineq angerlarsimaffimmiiginnarnerup, inuup innarluutillip imaluunniit allat atugarissaarnerisa navianartorsiortinnejangannginnissaat piumasaqataavoq.

*Imm. 2.* Inuk innarluutilik, inuk tamatuminnga pisariaqartitsippat, najugaqarfissatut neqeroorummi naleqquttumik tapersorsorneqarnissaminut pisinnaatitaavoq.

**§ 5.** Pisortat illuutaat atortorissaarutaataallu sapinngisamik ima aaqqissuunneqassapput inuit innarluutillit isersinnaanissaat atuisinnaanissaallu qulakkeerneqassalluni.

#### *Sullinniakkat*

**§ 6.** Inatsisartut inatsisaat manna, ukiut apeqquaatinngagit, inunnut innarluutilinnut Kalaallit Nunaanni najugaqartunut, atuuppoq.

*Imm. 2.* Inuit innarluutillit tassaapput inuit ataavartumik timikkut, tarnikkut, silassorissutsikkut imaluunniit malugisaqarsinnaanikkut piginnaanikillisimasut, aporfllu assigiinngitsut sunniivigeqatigiinnerisigut, allat assigalugit inuiaqatigiinni tamakiisumik sunniuteqarluartumillu peqataanissaannut akornuserneqartut.

*Imm. 3.* §§ 49-50-imi maleruagassat kiisalu allaffissornikkut najoqqutassiat § 56, imm. 7, aamma § 57, imm. 3 malillugit aalajangersagaasut, aammattaaq inunnut innarluutilinnut, pisortat tapersiinermi iliuuserisaannik Kalaallit Nunaata avataani inissinneqarsimasunut, atuupput.

**§ 7.** Meeqqat, inatsisartut inatsisaat manna aammalu Meeqqat tapersorsorneqarnissaannut Inatsisartut inatsisaat tunngavigalugit tapersorsorneqarnissamik pisinnaatitaasut, Inatsisartut inatsisaat taakku marluk tunngavigalugit pisariaqartitaminnik tapersorsorneqassapput. Ataqatigiissaakkamik kiisalu meeqqamut pitsaanerpaasussaq aallaavigalugu tapersersuineq tunniunneqassaaq.

*Imm. 2.* Meeqqamut innarluutilimmut tapersersuinerup Inatsisartut inatsisaat manna malillugu aallartinneqartup, meeqqat tapersorsorneqarnissaannut Inatsisartut inatsisaat aammalu inatsisit allat malillugit meeqqamut tassunga suliniuteqarnermut aallartinneqartumut, ataqatigiissinneqarnissaat kommunalbestyrelsip isumagissavaa. Meeqqamut immaqalu meeqqap ilaquaanut imaluunniit meeqqap isumassuisuinut tapersersuineq Inatsisartut inatsisaat manna malillugu aallartinneqartoq, inatsisit allat malillugit ilaqtariinnut suliniutigineqartunut ataqatigiissaarneqarnissaa kommunalbestyrelsip aammattaaq isumagissavaa.

#### **Kapitali 2**

*Aalajangiisinjaatitaaneq aamma akisussaaffeqarneq*

*Tapersiinissamat periarfissat*

**§ 8.** Inuit innarluutilillit pisariaqartitaminnut tapersorsorneqarnermik pisarnissaat, aamma lnatsisartut inatsisaat manna malillugu inunnut innarluutilinnut tapersiinissamut periarfissanik pisariaqartunik peqarnissaa, kommunalbestyrelsip isumagissavaa.

*Imm. 2.* Najugaqaqatigiiffinni aamma najugaqarfinni illersugaasuni inissat pisariaqartinneqartut naammattut pigineqarnerat kommunalbestyrelsip isumagissavaa.

*Ulloq unnuarlu neqeroorutit*

**§ 9.** Inunnut innarluutilinnut ulloq unnuarlu neqeroorutini inissat pisariaqartinneqartutut amerlassuseqarnissaat Naalakkersuisut isumagissavaat.

*Imm. 2.* § 48 malillugu inunnut innarluutilinnut, ulloq unnuarlu neqeroorutini najugaqartunut, Naalakkersuisut illersugaasumik suliffeqartitsinissamik, sammisaqartitsinissamik, katerisimaaqateqartitsisarnissanillu neqerooruteqassapput.

*Imm. 3.* § 48 malillugu suliffeqartitsinissanut, sammisassaqartitsinissanut katerisimaaqateqartitsisarnissanillu neqeroorutit pillugit maleruagassanik erseqqinnerusunik Naalakkersuisut aalajangersaassapput.

*Qitiusumik inissiinissamut innersuussisarfik*

**§ 10.** Qitiusumik inissiinissamut innersuussisarfimmik Naalakkersuisut ingerlatsissapput (Qitiusumik Inissiinissamut innersuussisarfik).

*Imm. 2.* Qitiusumik inissiinissamut innersuussisarfik pillugu maleruagassanik erseqqinnerusunik Naalakkersuisut aalajangersaasinnaapput, matuman iulloorutit pillugit maleruagassanik erseqqinnerusunik Innarluutilinnut Sullissivimmut Nunamut Tamarmut atuuttumut inissiinissaq ilanngullugit.

*Inunnut Innarluutilinnut Sullissivik Nunamut Tamarmut Atuuttoq*

**§ 11.** Inunnut innarluutilinnut sullissivimmik nunamut tamarmut atuuttumik Naalakkersuisut ingerlatsissapput, tassani suliassaassallutik:

- 1) inuit innarluutilillit ilaquaasalu lnatsisartut inatsisaat manna pillugu siunnersorneqartarnerat ilitsorsorneqartarnerallu, matuman iulloorutit pillugit aalajangiinerit naammagittaalliuutigineqartarnissaannut periarfissaqarneq ilanngullugu,
- 2) kommunalbestyrelsintut lnatsisartut inatsisaat manna pillugu siunnersuineq ilitsersuinerlu, matuman iulloorutit pillugit aalajangiinerit naammagittaalliuutigineqartarnissaannut periarfissaqarneq ilanngullugu,
- 3) § 44 malillugu, inuup innarluutilillip ulluinnarni sapinngisamik pitsaanerpaamik piginnaaneqarnissaa siunertaralugu, inunnut innarluutilinnut piginnaanngorsarneqarnissamik piginnaanngorsaqeqnissamillu neqerooruteqarneq,
- 4) inunnut innarluutilinnut tapersersuinermut pissutsinullu ilisimasat pillugit qitiusumik sullissiviunissaq,
- 5) kommuninut, inunnut innarluutilinnut taakkualu ilaquaannut, innarluuteqarneq aammalu tapersersuinermut periarfissat pillugit pikkorissaanernik neqerooruteqarneq,
- 6) § 25 malillugu, sulianilu immikkut pisariusuni kommunalbestyrelsimit piumaffigineqarneq malillugu, qualaajaaneq, aamma

7) § 61, imm. 4 malillugu communalbestyrelsimit piumaffigineqarneq malillugu najugaqarfissatut neqeroorummiikkunnaarnissaq pillugu suliani oqaaseqaateqartarneq.

*Imm. 2. Inunnut Innarlutilinnut Sullissivimmut Nunamut Tamarmut Atuuttumut communalbestyrelsip atuineranut akigititat pillugit maleruagassanik erseqqinnerusunik Naalakkersuisut aalajangersaasinnaapput.*

**§ 12.** Suliami aalajangersimasumi, paasissutissallu suliap suliarineqarneranut pingaaruteqarpata, paasissutissanik inummut tunngassuteqartunik, § 11, imm. 1 malillugu suliaqartillugit, communalbestyrelse Inunnut Innarlutilinnut Sullissivimmit Nunamut Tamarmut Atuuttumut ingerlatitseqqissinnaavoq, matumani paasissutissat inummut aalajangersimasumut tunngassuteqartut ilanngullugit.

*Imm. 2. Aatsaat inuk suliami pineqartoq, imaluunniit tassunga angajoqqaatut sinniisuuusoq imaluunniit angajoqqaatut akisussaasoq akuersiteeqqaarlugit imm. 1 malillugu inummut paasissutissat communalbestyrelsip ingerlateqqissinnaavai, taamaattoq takuuk imm. 3.*

*Imm. 3. Imm. 2 malillugu akuersissut tunniunneqarumanngippat, imaluunniit allanik pissuteqartumik akuersisummik piniartoqarsinnaanngippat, communalbestyrelsip paasissutissat inummut tunngasut ingerlateqqissinnaavai, matumani paasissutissat inunnut tunngasut mianerilluinnartariaqartut ilanngullugit, suliami pissutsit, matumani inuup inatsisitigut isumannaatsuunissaata eqqarsaatigineqarnera ilanngullugu, erseqqissumik pisariaqartippassuk. Ingerlatitseqqinnermut piumasaqaataavoq inuup soqutigisaanik nakkutiginninnissaq, taamaaliornerullu isertuussiinnarnissamik peqquteqarnissamut soqutigisat ersarissumik qaangersimassagai, matumani inuup pineqartup, paasissutissat tunngaviata, mianerineqarnissaata eqqarsaatigineqarnissaa ilanngullugu.*

### Kapitali 3

*Najugaqarfissatut neqeroorutinik pilersitsisarneq ingerlatsinerlu*

*Najugaqaqtigiiffit aamma najugaqarfit illersugaasut*

**§ 13.** Inunnut innarlutilinnut najugaqaqtigiiffinnik communalbestyrelse pilersitsisinnaavoq, ingerlatsisinnaavoq matusisinhaallunilu. Najugaqaqtigiiffik najugaqartunut ulluunerani tapersersuinissamik neqerooruteqassaaq.

*Imm. 2. Najugaqaqtigiiffinnik pilersitsinissamik Naalakkersuisut communalbestyrelse peqqusinnaavaat, ima pisoqartillugu:*

1) inuit marluk arlalliuunniit, § 46 malillugu najugaqaqtigiiffimi ineqarnissamut pisinnaatitaasut, 18-it sinnerlugit ukioqarpata aammalu kommunimi najugaqarlutik, aamma

2) pineqartut taakkua ataatsimoorlutik najugaqtigiissinnaappata.

*Imm. 3. Najugaqaqtigiiffit pillugit maleruagassanik erseqqinnerusunik Naalakkersuisut aalajangersaassapput, matumani ilanngullugit:*

1) najugaqaqtigiiffit aaqqissuunneqarnerat,

2) aqtsinikkut sulisoqarnikkullu piginnaasaqarfut, aamma

3) sulisunut pisortanullu pinerluuteqarsimannnginnermik, aamma meeqqanik pinerliisimannnginnermik uppernarsaammik piniarnissaq.

**§ 14.** Inunnut innarluutilinnut najugaqarfinnik illersugaasunik communalbestyrelse pilersitsisinnaavod, ingerlatsisinhaavoq matusisinhaallunilu. Najugaqarfik illersugaasoq ulloq unnuarlu tamaat tapersersuinissamik najugaqartunut neqerooruteqassaaq.

*Imm. 2.* § 47 malillugu najugaqarfimmik illersugaasumi ineqarnissamut pisinnaatitaasunut inunnut marlunnut arlalinnulluunniit, 18-it sinnerlugit ukiulinnut kommune angerlarsimaffittut kommunerineqarpat, najugaqarfimmik illersugaasumik communalbestyrelse pilersitseqqullugu Naalakkersuisut peqqusinnaavaat.

*Imm. 3.* Najugaqarfinnut illersugaasunut maleruagassanik erseqqinnerusunik Naalakkersuisut aalajangersaassapput, matumani ilanngullugit:

- 1) najugaqarfuit illersugaasut aaqqissuunneqarnerat,
- 2) aqutsinikkut sulisoqarnikkullu piginnaasassat, aamma
- 3) sulisunut pisortanullu pinerluuteqarsimannginnermik, aamma meeqqanik pinerliisimannginnermik uppernarsaammik piniarnissaq.

**§ 15.** Najugaqaqtigiffit aamma najugaqarfuit illersugaasut pitsaassusissaannut malitassat pillugit maleruagassanik erseqqinnerusunik Naalakkersuisut aalajangersaassapput.

**§ 16.** Inuk kommunimi allami inissisimasumi najugaqaqtigiffimiinnissamik imaluunniit najugaqarfimmik illersugaasumiinnissamik neqeroorfigineqassasoq communalbestyrelse aalajangerpat, communalbestyrelsip inuup najugaqaqtigiffimiinnneranut imaluunniit najugaqarfimmik illersugaasumiinneranut aningaasartuutit akilissavai.

*Imm. 2.* *Imm. 1* malillugu kommunip avataani najugaqaqtigiffimiinnissaq imaluunniit najugaqarfimmik illersugaasumiinnissaq neqeroorutigineqarpat, communalbestyrelse najugarisap nuunneqarnerani aningaasartuutinut matussutissanik aningaasaqarnikkut tapersiinissamik neqerooruteqassaaq.

**§ 17.** Kommunalbestyrelse ataatsimiitaliamik pilersitsisinnaavoq, tassani kommunimi najugaqaqtigiffit aamma najugaqarfuit illersugaasut tamarmik imaluunniit aalajangersimasut, kiisalu aallartitat allat najugaqaqtigiffinni aamma najugaqaqtigiffinni illersugaasuni najugaqartunut tamakkiisumik isiginnittumik ataqatigiissaarinermi akuutinneqarnissaannik naleqquttuusorineqartut, aallartitaassallutik.

*Imm. 2.* Oqartussaasut peqataasut suliani ataasiakkaani suleqatigiinnermut ilaattillugu paasissutissat suliap suliarineqarneranut pingaaruteqarpata, inummut paasissutissat paarlasseqatigiissutigisinnavaat, matumani paasissutissat inummut tunngasut mianerisariallit ilanngullugit. Inummit suliami pineqartumit, imaluunniit taassuma angajoqqaatut sinniisuanit imaluunniit angajoqqaatut akisussaasunit akuersissut tunniunneqarpat aatsaat, oqaaseqatigiit siulliit malillugit paasissutissanik paarlasseqatigiittoqarsinnaavoq, taamaattoq takuuk imm. 3.

*Imm. 3.* *Imm. 2* malillugu akuersineq tunniunneqarumanngippat, imaluunniit allanik pissuteqartumik akuersinerup piniarnissaa ajornarpat, suliami pisut, matumani inuup inatsisitigut isumannaatsuuunissaata eqqarsaatigineqarnera ilanngullugu, tamanna pisariaqartippassuk, paasissutissat inummut tunngasut, matumani paasissutissat inummut tunngasut mianerisariallit ilanngullugit, paarlasseqatigiissutigineqassapput.

## Ulloq unnuarlu neqeroorutit

**§ 18.** Naalakkersuisut inunnut innarluutilinnut ulloq unnuarlu neqeroorummik pilersitsisinhaapput, ingerlatsisinhaapput matusisinnaallutilu, matumani ulloq unnuarlu neqeroorutit matoqqasut ilanngullugit.

*Imm. 2.* Ulloq unnuarlu neqeroorut matoqqasooq tassaavoq ulloq unnuarlu neqeroorut, imaluunniit ulloq unnuarlu neqeroorummii immikkoortortaq, matut silarliit igalaallu parnaaqqtuarnissaannut akuerisaasoq.

*Imm. 3.* Ulloq unnuarlu neqeroorutinut maleruagassanik erseqqinnerusunik Naalakkersuisut aalajangersaassapput, matumani pilersitsineq, aaqqissugaanera, aqutsisui, ingerlatsineq kiisalu ulloq unnuarlu neqeroorummii sulisunut pisortanullu pinerluuteqarsimannginnermik aamma meeqqanik pinerliisimannginnermik uppermarsaammik piniarnissaq ilanngullugit.

**§ 19.** Inummut innarluutilimmumut ulloq unnuarlu neqeroorummiiittumut ulloq unnuarlu inissiiviusumut ataatsimut akigititaq aalajangersagaasoq atorlugu kommunalbestyrelse inissiisoq akiliissaq.

*Imm. 2.* Imm. 1 malillugu ullormut unnuamullu inissiinermi akigititaq atorneqartoq, kommunalbestyrelsip inissiimasup akiliutissaa, Naalakkersuisut kommunalbestyrelsillu, imaluunniit kommunit ataatsimoorlutik sinnisaata, isumaqatigiinniareernerisigut ukiumoortumik aalajangerneqartassaaq, taamaalilluni akigitat tamarmiusup ulloq unnuarlu neqeroorutip ingerlatsinerminut aningaasartuutai matussuserneqarniassammata. Imm. 1 malillugu Naalakkersuisut ulloq unnuarlu neqeroorummiiinnermut akigititaq ukiumoortumik aalajangersassavaat aammalu Naalakkersuisut.gl atorlugu tamanut saqqummersissallugu.

**§ 20.** Ulloq unnuarlu neqeroorut Naalakkersuisunut ukiumoortumik nalunaarusiortassaaq.

Naalakkersuisut kingusinnerpaamik Inatsisartut upernaakkut ataatsimiinneranni Inatsisartunut ataatsimoortumik ukiumoortumik nalunaarusiortassapput.

*Imm. 2.* Ukiumoortumik nalunaarusiornermut maleruagassanik erseqqinnerusunik Naalakkersuisut aalajangersaasinnaapput.

**§ 21.** Ukiut 4-kkaarlugit ataasiarlutik ulloq unnuarlu neqeroorutinut suliassaqarfiup ineriaartinnejarnissaanut nuna tamakkerlugu periusissamik Naalakkersuisut suliaqartassapput, siullermik 2021-imi suliarineqassalluni.

*Imm. 2.* Periusissami imarineqassapput:

- 1) Ulloq unnuarlu neqeroorummik pilersitsineq matusinerlu.
- 2) Ulloq unnuarlu neqeroorutini ataasiakkani sullinniarneqartut kiisalu tessani allannguuteqartitsinissamik kissaatigineqartut.
- 3) Ulloq unnuarlu neqeroorutinut innersuussisarneq pillugu kommunimik suleqateqarneq, matumani najugaqaqatigiiffinnik aamma najugaqarfinnik illersugaasunik suleqateqarneq ilanngullugit.

*Imm. 3.* Ulloq unnuarlu neqeroorutini pisortat, soqtigisaqaqatigiiffit attuumassuteqartut kiisalu kommunalbestyrelsit Naalakkersuisut periusissanik suliaqarnerminni akuutissavaat.

## *Sullissinermi maleruagassat*

### *Piffissaliussat*

**§ 22.** Inatsisartut inatsisaat manna malillugu taperserneqarnissaq pisinnaatitaaffigineqarnersoq, taamaattoqarpallu suut tapersiissutaassanersut pillugit apeqqutigineqartut, sabinngisamik sukkasuumik kommunalbestyrelsip suliarissavai.

*Imm. 2.* Taperserneqarnissaq pillugu qinnuteqaatip tiguneqarneranit, aalajangiinerup pereersimanissaanut piffissaq qanoq sivisutigissanersoq, piffissamut killiliussanik kommunalbestyrelse aalajangersaassaaq. Inatsisartut inatsisaat manna malillugu piffissaliussisoqarsimappat, tamanna atuutissanngilaq. Piffissamut killissaliussat annerpaamik ukiut 2-kkaarlugit nalilersorneqartassapput kommunillu internettikkut quppersagaani tamanut saqqummiunneqassallutik.

*Imm. 3.* Imm. 2 malillugu piffissamut killiliussaq, suliami aalajangersimasumi malinnejqarsinnaanngippat, inuk innarluutilik imaluunniit taassumunnga angajoqqaatut sinniisoqarsimaguni sinniisuusoq imaluunniit angajoqqaatut akisussaasut, piffissaliussap naannginnerani aalajangiineq qaqguq pisinnaanersoq pillugu allaganngorlugu nalunaarfingineqassaaq, tassani aamma ilaassalluni sooq piffissaliussaq eqqortinnejqarsinnaasimannginnersoq.

### *Oqaloqateqarneq*

**§ 23.** §§ 38, 60 aamma 61 malillugit aalajangiisoqannginnerani kommunalbestyrelsip inuk innarluutilik minnerpaamik ataasiarluni oqaloqatigissavaa, taamaattoq takuuk imm. 4.

*Imm. 2.* Imm. 1 malillugu kommunalbestyrelsip oqaloqateqarnermini inuup innarluuteqarnera mianerissavaa aammalu oqaloqateqarneq inuup innarluutillip piumasai tunnavigalugit ingerlatissallugu.

*Imm. 3.* Inuk innarluutilik 18-it inorlugit ukioqarpat imaluunniit nammineersinnaajunnaarsitaasimappat imm. 1 malillugu oqaloqatigineqarnera, inuk innarluutilik, taassumalu angajoqqaatut akisussaasui imaluunniit angajoqqaatut sinniisoqarsimaguni sinniisaa, peqataatillugit ingerlanneqassaaq. Taamaattoq inummut innarluutilimmuit mianerissassat tamanna pisariaqartippassuk, angajoqqaatut akisussaasut imaluunniit angajoqqaatut sinniisoq akuersitinnagu imaluunniit najuutsinnagu oqaloqateqarneq ingerlanneqarsinnaavoq. Angajoqqaatut akisussaasut imaluunniit angajoqqaatut sinniisoq akuersiteeqqaarnagit peqataatinngilluunniit oqaloqateqarneq ingerlanneqassappat, taava § 24 malillugu illersuisumik toqqaasoqassaaq ilaasoqarlunilu.

*Imm. 4.* Inuup inerisimanera piginnaasaqarneralu imaluunniit suliap suussusaa eqqarsaatigalugit oqaloqateqarnerup ingerlanneqarnissaa aalajangiisuusumik naleqqutinngippat, imm. 1 malillugu oqaloqateqarneq ingerlanneqassanngitsoq kommunalbestyrelsip aalajangersinnaavaa. Oqaloqateqarneq ingerlanneqarsinnaanngippat, inuup innarluutillip aalajangiinissatut eqqarsaatigineqartumut isumaa allatut pissarsiariniarneqassaaq. Oqaloqateqarneq pisimanngippat, inuup iliuusissanut pilersaarutaani tamanna pissutaasorlu pillugit allattoqassaaq.

### *Illersuisoq*

**§ 24.** Illersuisoqarnermik aaqqissuussineq communalbestyrelsimit pilersinnejassaaq siunertaralugu inuup innarluutillip illersuisumit tapersorsorneqarnissaq:

- 1) Inatsisartut inatsisaat manna malillugu communalbestyrelsip tapersiinissaq pillugu suliamik suliarinninnerani,
- 2) Inatsisartut inatsisaat manna malillugu communalbestyrelsip tapersiinissaq pillugu aalajangiineranut naammagittaalliummik suliaqarnissami tunniussinissamilu, aamma
- 3) Inatsisartut inatsisaat manna malillugu tapersiinissaq pillugu aalajangiinermut tunngatillugu naammagittaalliummut suliamik Isumaginninnermi Naammagittaalliuuteqartarfiup suliarinninnerani.

*Imm. 2.* Toqqaasarneq, aningasarsiaqartitsisarnaq, pinerluuteqarsimanginnermut meeqqanillu innarliisimanginnermut upternarsaammik piniartarneq, kiisalu piukkunnassutsinut piginnaasaqarfnnullu piumasaqaatit suut illersuisumit piumasaqaatigineqartassanersut pilligit maleruagassanik ersarinnerusunik Naalakkersuisut aalajangersaasinnaapput.

#### *Qulaajaaneq*

**§ 25.** Inuk kapitali 8-mi aalajangersakkat malillugit tapersorsorneqarnissamik imaluunniit kapitali 9-mi aalajangersakkat malillugit najugaqarfissatut neqeroorummi najugaqarnissamik pisariaqartitsisoq ilimagineqartariaqarpat, inummut innarluutilimmur tunngasunik qulaajaanermik communalbestyrelse suliaqassaaq. Taamaattoq qulaajaanissaq pisariaqanngitsoq ersarippat, qulaajaaneq ingerlanneqassanngilaq.

*Imm. 2.* Qulaajaaneq sapingnisamik tulliini taaneqartut suleqatigalugit ingerlanneqassaaq:

- 1) inuk innarluuteqartoq,
- 2) nammineersinnaajunnaarsitaasimappat angajoqqaatut sinniisia,
- 3) angajoqqaatut sinniisoq, meeraasimappat tassunga angajoqqaatut akisussaasoq, kiisalu
- 4) isumassuisui allat.

*Imm. 3.* Qulaajaaneq, pissutsit pisinnaatippassuk, sapingnisamik qajassuartumik ingerlanneqassaaq, aammalu siunertaasuni allassimasunit annertunerusinnaanani.

*Imm. 4.* Qulaajaanermut atatillugu communalbestyrelsip makkua nalilersussavai:

- 1) Ataavartumik timikkut, tarnikkut, silassorissutsikkut imaluunniit malugisaqarsinnaanikkut piginnaanikillisimanerup annertussusaa.
- 2) Imminut isumassorseq.
- 3) Pissusilersoneq, atugarissaarneq ineriartornerlu.
- 4) Attaveqaqatigiinneq.
- 5) Ilaqutariinnermi pissutsit.
- 6) Inooqatigiinnermi pissutsit aamma inooqatigiinni inooqataaneq.
- 7) Peqqissutsimut tunngasut.
- 8) Ilinniarneq, suliffeqarneq aamma suliffeqarnissamut periarfissat.
- 9) Inuaqatigiinni peqataaneq.
- 10) Inatsisartut inatsisaat manna malillugu imaluunniit inatsisit allat malillugit tapersersuineq, inummut ikorsiissutigineqareersoq.

*Imm. 5.* Tapersiinerup aallartinneqarnissaa tunngavissaqarnersoq pillugu communalbestyrelse qulaajaaneq tunuliaqutaralugu aalajangiissaaq.

*Imm. 6.* § 26 malillugu qulaajaaneq allaganngorlugu iliuusissanut pilersaarummik tunngavilersugaasumik inerneqassaaq.

*Imm. 7.* § 38, imm. 4 malillugu tapersiinissaq pillugu communalbestyrelse aalajangiigallarsimappat, tapersiineq aalajangiigallarneq tunngavigalugu aallartinneqartoq ingerlatiinnarneqassanersoq imaluunniit unitsinneqassanersoq, qulaajaanerup naammassineranut atatillugu communalbestyrelse isummissaaq. Tassunga atatillugu inuk tassungalu angajoqqaatut sinniisoq imaluunniit angajoqqaatut akisussaasut tapersiinermut isummernissaat eqqarsaatigineqassaaq.

*Imm. 8.* Imm. 1 malillugu suliani immikkut pisariussusilinni § 11, imm. 1, nr. 6 malillugu qulaajaaneq Inunnut innarluutilinnut Sullissivimmut Nunamut Tamarmut Atuuttumut communalbestyrelsip suliareqqusinnaavaa.

*Imm. 9.* Qulaajaanermut maleduagassanik erseqqinnerusunik Naalakkersuisut aalajangersaassapput, matumani qulaajaanerup ingerlanneqarnissaa, ilusissaa imassaalu kiisalu ingerlaneqarnissaanut naammassineqarnissaanullu piffisanut piumasaqaatit ilanngullugit.

#### *Iliuusissanut pilersaarut*

**§ 26.** Inunnut innarluutilinnut communalbestyrelsit allaganngorlugu iliuusissanut pilersaarutinik suliaqassapput ima pisoqartillugu:

- 1) § 25 malillugu qulaajaanermut atatillugu.
- 2) Kapitali 8 malillugu tapersorsorneqarnissap imaluunniit kapitali 9 malillugu najugaqarfissatut neqeroorummi najugaqarnissap aallartinnissaa pillugu aalajangiisoqannginnerani.
- 3) Kapitali 14 malillugu tapersiinerup allangortinneqarnissaa imaluunniit unitsinneqarnissaa pillugit aalajangiisoqannginnerani.
- 4) Meeqqap innarluutilip, lnatsisartut inatsisaat manna malillugu tapersiivigineqartup, meeqqat atuarfianni atualernissaa kingusinnerpaamik qaammatinik 6-inik sioqqullugu.
- 5) Meeqqap innarluutilip, lnatsisartut inatsisaat manna malillugu tapersiivigineqartup, meeqqat atuarfianni atuarnerata naammassinissaa kingusinnerpaamik qaammatinik 12-inik sioqqullugu.
- 6) Meeqqap innarluutilip, lnatsisartut inatsisaat manna malillugu tapersiivigineqartup, 18-inik ukioqalernissaa kingusinnerpaamik qaammatinik 12-inik sioqqullugu.

*Imm. 2.* Iliuusissanut pilersaarut inummut innarluutilimmut tunngasuussaaq aammalu siunertaasup allassimaneranit, annertunerusinnaanani.

*Imm. 3.* Iliuusissanut pilersaarummi tulliini taaneqartut allassimassapput:

- 1) Siunertaq aamma tapersiinermi anguniagaq.
- 2) Anguniagaq imaluunniit anguniakkat anguneqarnissaannut tapersiineq suna pisariaqarnersoq.
- 3) Tapersiinerup sivisussussissaatut naatsorsuutigineqartoq.
- 4) Tapersiinerup malinnaavigineqarnissaa, matumuuna malitseqartitsineq qaqgukkut pisassanersoq ilanngullugu.
- 5) Inatsisartut inatsisaat manna malillugu aamma inatsisit allat malillugit tapersiinerit allat ataqtigiinnerat.
- 6) Ilaquttat attaveqarfillu, najugaqariaaseq, ilinniartitaaneq, suliffeqarneq, inuttut ikiorteqarneq, katsorsartinneq aamma atortorissaarutit ikuutaasut il.il. pillugit pissutsit immikkut ittut allat.

*Imm. 4. Iliusissanut pilersarut sapingisamik inuk innarluutilik tassungalu angajoqqaatut akisussasut imaluunniit angajoqqaatut sinniisoqarpal sinniisui aamma allat isumassuisui oqaloqatigalugit suleqatigalugillu suliarineqassaaq.*

*Imm. 5. Kapitali 9 malillugu najugaqarfissatut neqeroorummiinnermi iliussasanut pilersarutip ilai attuumassuteqartut najugaqarfissatut neqeroorummum tunniunneqarnissaat communalbestyrelsip isumagissavaa.*

*Imm. 6. Iliusissanut pilersarut inummut innarluutilimmut tassungalu angajoqqaatut sinniisoqarsimaguni sinniisui imaluunniit angajoqqaatut akisussasunut tunniunneqassaaq, aammal Kommunalbestyrelse tunniussinermut atatillugu taassuma imarisai pillugit ilisimatitsissaaq.*

*Imm. 7. Iliusissanut pilersarutip ilusaa imarisaalu kiisalu sulianik ingerlatitsinermut aamma iliussasanut pilersarutip naammassineqarnissaanut piffissatigut piumasaqaatit pillugit maleruagassanik erseqqinnerusunik Naalakkersuisut aalajangersaassapput.*

#### *Ineriartitsinissamut pilersarut*

**§ 27.** § 26 malillugu ulloq unnuarlu neqeroorut inummut innarluutilimmut iliussasanut pilersarut aallaavigalugu, ulloq unnuarlu neqeroorummi najugaqnerup aallartinneranit kingusinnerpaamik qaammatit 3-t qaangiunneranni tamatumalu kingorna ukiumut minnerpaamik 1-riarluni, ineriartitsinissamut pilersaarummi suliaqartassaaq. Ineriartitsinissamut pilersarummi, iliussasanut pilersarummi siunertaasut aamma ulloq unnuarlu neqeroorummiitsinermut anguniakkat aallaavigalugit, perorsaanikkut suliaqarneq, iliussasanut pilersarummi anguniakkat anguneqarnissaannik qulakkeerinnittussat, nassuarneqassapput.

*Imm. 2. Inunnut ulloq unnuarlu neqeroorummiittunut ineriartitsinermut pilersarutip ilusaa imarisaalu pillugit maleruagassanik erseqqinnerusunik Naalakkersuisut aalajangersaassapput.*

#### *Killiffinnut nalunaarusiaq*

**§ 28.** Kommunalbestyrelsip § 62, imm. 1 malillugu inummut sammititamik nakkutilliinermini atugassaanik, inuup innarluutilip atugarissaarnera ineriartorneralu, § 26 malillugu iliussissatut pilersaarummut, aamma § 27 malillugu ineriartornissamut pilersaarummut naleqqiullugit, killiffinnut nalunaarusiatut ilusilimmik, ulloq unnuarlu neqeroorutip communalbestyrelse ilisimatissavaa. Inuup peqqissusaanut tunngasuni imaluunniit inooqataanerani tunngasuni annertuumik allanngortoqarpal imaluunniit allanngortoqassasoq naatsorsuutigineqarpal, ulloq unnuarlu neqeroorutip piaartumik communalbestyrelse nalunaarfingissavaa.

*Imm. 2. Killiffinnut nalunaarusiat ulloq unnuarlu neqeroorummiinnerup aallartinnerata kingorna kingusinnerpaamik qaammatit 3-t qaangiunneranni communalbestyrelsintut nassiunneqartassapput. Tamatuma kingorna killiffinnut nalunaarusiat ima nassiunneqartassallutik:*

- 1) inuit innarluutillit 18-it inorlugit ukiullit pillugit ukioq affakkaarlugu 1-riarluni aamma
- 2) inuit innarluutillit 18-it sinnerlugit ukiullit pillugit ukioq 1-ikkaallugu.

*Imm. 3. Imm. 2 malillugu killiffinnut nalunaarutinik nassisarnermi saniatigut, inuup peqqissusaan inooqatigiinniuunniit pissutsit pillugit pingaarutilimmik allanngortoqarpal, ulloq unnuarlu neqeroorutip communalbestyrelse ilisimatissavaa.*

*Imm. 4. Inunnut innarluutilinnut ulloq unnuarlu neqeroorumiittunut killiffinnut nalunaarusi ap ilusaa imarisalu pillugit maleruagassanik erseqqinnerusunik Naalakkersuisut aalajangersaassapput.*

*Nalunaarutiginnittussaatitaaneq aamma utertillugit akiliisussaatitaaneq*

**§ 29.** Inuk innarluutilik, Inatsisartut inatsisaat manna malillugu tapersiivigineqarnissamik qinnuteqartoq, kommunalbestyrelsip piumaffigisinnavaavaa:

- 1) paasissutissanik inuup qanoq tapersiivigineqarnissamut pisinnaatitaaneranik kommunalbestyrelsip aalajangiisinnaanissaanut pisariaqartunik pissarsiniarnermi peqataassasoq, aamma
- 2) § 25 malillugu qulaajaanermut ilaatiillugu nakorsamit misisortissasoq imaluunniit malinnaavigineqarnissamut katsorsartinnissamullu napparsimavimmut unitsinnejassasoq.

*Imm. 2. Inuup innarluutillip tassungalu angajoqqaatut sinniisoqarsimaguni sinniisup imaluunniit angajoqqaatut akisussaasut akuersineratigut, oqartussanit allanit inummut tunngasunik ilisimasaqtunit imaluunniit inummik innarluutilimmik ilisarisimannittunit paasissutissanik, Inatsisartut inatsisaat manna malillugu tapersiivigineqarnissaq pillugu qinnuteqaatip suliarineqarsinnaanissaanut pisariaqartutut isigneqartariaqartunik, communalbestyrelse piniarsinnaavoq. Inuk innarluutilik paasissutissiiviusumik akuersisinnaanngippat, inuullu innarluutillip soqtigisaasa isumaginissaannut tamanna pingaaruteqartutut isigneqartariaqarpat, taamaakkaluartoq communalbestyrelse paasissutissanik piniarsinnaavoq, taamaattoq takuuq imm. 3.*

*Imm. 3. Inuk innarluutilik kingunissaasinnaasut pillugit ilisimatinneqareerluni akuersisummi k tunniussisinnanngippat, aamma taassuma angajoqqaatut sinniisoqarsimaguni sinniisuanit imaluunniit angajoqqaatut akisussaasunit akuersissut pineqarsinnaasimanngippat, tamanna inuup soqtigisaasa nakkutigineqarnissaannut pingaaruteqarpat, communalbestyrelsip paasissutissat inummut tunngasut pissarsiariniarsinnaavai.*

**§ 30.** Inuk innarluutilik Inatsisartut inatsisaat manna malillugu tapersiivigineqartoq, tassungalu angajoqqaatut sinniisoqarsimaguni sinniisua imaluunniit angajoqqaatut akisussaasui, inummut innarluutilimmut tunngasuni allanguutit tamaasa, tapersiinerup tamakkiisumik ilaannaasumilluunniit allangortinneqartariaqarnerannik imaluunniit unitsinnejarnissaannik malitseqarsinnaasut, pillugit communalbestyrelsip ilisimatinnissaanik pisussaaffeqarput.

*Imm. 2. Inuup imm. 1-im paasissutissussaatitaaneq taaneqartoq naammassinngippagu imaluunniit ilisimareeraluarlugu Inatsisartut inatsisaat manna malillugu tapersiissutinik pisinnaatitaanani tigusaqarsimappat, communalbestyrelsip tiguneqarsimasut utertillugit akilerneqassasut imaluunniit utertillugit tunniunneqassasut piumasarisinnaavai.*

*Imm. 3. Imm. 2 malillugu tapersiissutip pisussaanani ikorsiissutigineqartup utertillugu akilernissaa imaluunniit utertillugu tunniunnissaa pillugu Naalakkersuisut maleruagassanik aalajangersaasinnaapput, matumani utertillugit akiliinissamut piffissatigut maleruagassat, ernialersuineq il.il.*

*Suliani aalajangersimasuni paasissutissanik paarlasseqatigiittarneq*

**§ 31.** Najugaqarfissatut neqeroorutip, communalbestyrelsip, ilinniarfeqarfit peqqinnissaqarfullu suliani ataasiakkaani suleqatigijinnermut ilaatiillugu, paasissutissat suliap suliarineqarneranut pingaaruteqarpata,

inummut paasissutissat politiinut ingerlateqqissinnaavaa, matumani paasissutissat inummut tunngasut mianernartut ilanngullugit. Inuk suliami pineqartoq, imaluunniit taassuma angajoqqaatut sinniisua imaluunniit angajoqqaatut akisussaasui akuersiteeqqaarlugu paasissutissanik ingerlatitseqqitqarsinnaavoq, taamaattoq takuu imm. 2.

*Imm. 2. Imm. 2 malillugu akuersissut tunniunneqarumanngippat, imaluunniit allanik pissuteqartumik akuersisummik piniartoqarsinnaanngippat, communalbestyrelsip paasissutissat inummut tunngasut ingerlateqqissinnaavai, matumani paasissutissat inunnut tunngasut mianerilluinnartariaqartut ilanngullugit, suliami pissutsit, matumani inuup inatsisitigut isumannaatsuunissaata eqqarsaatigineqarnera ilanngullugu, erseqqissumik pisariaqartippassuk. Ingerlatitseqqinnermut piumasaqaataavoq inuup soqutigisaanik nakkutiginninnissaq, taamaaliornerullu isertuussiinnarnissamik peqquteqarnissamut soqutigisat ersarissumik qaangersimassagai, matumani inuup pineqartup, paasissutissat tunngaviata, mianerineqarnissaata eqqarsaatigineqarnissa ilanngullugu.*

## Kapitali 5

*Nalunaarutiginnittarneq*

*Nalunaarutiginnittussaatitaaneq nalinginnaasoq*

**§ 32.** Inuup innarluutilip atugarissaarneranut, peqqissusaanut imaluunniit ineriarorneranut navianartorsiortitsisumik atugaqartinneqartoq innuttaasup paasiguniuk, innuttaasup kialluunniit communalbestyrelsimumt nalunaaruteqarnissani pisussaaffigaa.

*Imm. 2. Kommunalbestyrelsip nalunaarutiginninnerup tigunerata kingorna sapaatip akunnerata ataatsip qaangiutinnginnerani, nalunaarutiginninneq tiguneqartoq innuttaasumut allaganngorlugu upternarsaalluni nassiuressavaa.*

*Sakkortusisamik nalunaarutiginnittussaatitaaneq*

**§ 33.** Isumaginnittoqarfinni, peqqinnissaqarfinni ilinniartoqarfinnilu sulisut, inuk innarluutilik tapersiivigineqarnissamik pisariaqartitsisoq, inuussutissarsiutigalugu sulinerminnut atatillugu sulisup paasiguniuk imaluunniit ilimagineissaanut pissutissaqaruni, ingerlaannaq communalbestyrelsimumt nalunaaruteqarnissamik sukannernerusumik pisussaaffeqarput. Nalunaarutiginnittussaatitaaneq taanna, innuttaasunit tamanit qinerneqarlutik suliaqartunut imaluunniit inuiaqtigiinni sullissillutik suliaqartunut, atuupoq.

*Imm. 2. Nalunaarutiginninnerup tigunerata kingorna sapaatip akunnera ataaseq qaangiutsinnagu sulisumut nalunaarutiginnittumut, nalunaarutiginninneq tiguneqartoq allaganngorlugu upternarsarlugu communalbestyrelsip nassiuressavaa.*

*Kommunit akunnerminni nalunaarutiginnittussaatitaanerat*

**§ 34.** Kommunalbestyrelsip kommune nuuffigineqartoq allaganngorlugu nalunaarfigissavaa:

1) § 40 malillugu inuk innarluutilik nammineq angerlarsimaffimmini ulluinnarni isumassorneqartoq, kommunimut allamut nuuppat, aamma inuk innarluutilik lnatsisartut inatsisaat manna malillugu suli

tapersiivigineqarnissamik pisariaqartitsisoq communalbestyrelse isumaqarpat,  
2) kapitali 9 malillugu inuk innarluutilik najugaqarfissatut neqeroorummum inissinneqartoq, nammineq piumassutsini malillugu kommunimut allamut nuuppat, aamma  
3) inuk innarluutilik nammineq piumasani malillugu kommuninut allamut nuuppat, aamma kapitali 8 malillugu tapersiissutinik pisariaqartunik inuttaa pinngikkuni inuup atugarissaarnera navianartorsiortinnejassasoq nalilerneqarpat.

*Imm. 2. Imm. 1 malillugu nalunaarutiginninnermut atatillugu kommunip qimanneqartup suliassami najoqqutassat attuumassuteqartut nassiutissavai, matumani paasissutissat attuumassuteqartut eqikkarneqarnerat, tapersiivigineqarnissamik pisariaqartitsinermik naliliinermut kommunip qimanneqartup tunngavigisimasai, ilanngullugit.*

*Imm. 3. Kalaallit Nunaannit nuuttoqartillugu, kommunimut nunani allaniittumut imaluunniit oqartussamut taamaaqataanut allamut tunngatillugu imm. 1-2 taamaaqataanik atuupput.*

*Nuna tamakkerlugu nalunaarutiginninnermi periaaseq*

**§ 35.** Naalakkersuisut §§ 32-34 malillugit nalunaarutiginninnerit, nalunaarutiginninnerut ataatsimoortumik takussutissiinissamik siunertaqartut pillugit, nuna tamakkerlugu nalunaarutiginnittarnermut ataqtigiimmik aaqqissuussinermik ingerlatsissapput.

*Imm. 2. Nuna tamakkerlugu nalunaarutiginnittarnermut ataqtigiimmik aaqqissuussineq pillugu maleruagassanik erseqqinnerusunik Naalakkersuisut aalajangersaasinnaapput, matumani ingerlatsined, paasissutissanik nalunaarsukkanik isumaginnineq aamma paasissutissanik katersineq ilanngullugit.*

*Kommunip nalunaarutiginnittoqarnerani iliuuseqartussaatitaanera*

**§ 36.** §§ 32, 33 aamma 34 malillugit communalbestyrelsip nalunaarutiginnineq tiguguniuk, piaarnerpaamik, taamaattoq ulla suliffiusut 5-it iluanni, § 25 malillugu qulaajaanermik aallartitsinissamik tunngavissaqarnersoq pillugu aalajangiissaq.

*Imm. 2. Imm. 1 malillugu qulaajaaneq aallartinneqassasoq communalbestyrelse aalajangiippat, qulaajaaneq piaartumik aammalu kingusinnerpaamik nalunaarutiginninnerup tiguneqarnerata kingorna sapaatit akunneri marluk qaangiutsinnagit, aallartinneqassaaq.*

*Imm. 3. Inummik innarluutilimmik paarsinerluttoqarneranik, persuttaasoqarsimaneranik imaluunniit kinguaassiutitigut atornerluisoqarsimaneranik communalbestyrelsimum pasitsatsitsisumik nalunaarutiginninnermik tigusisoqartillugu, taava § 25, imm. 1 malillugu qulaajaaneq aammalu § 38, imm. 4 malillugu tapersiisoqassappallu tapersiissuteqarallarneq ingerlaannaq aallartinneqassapput, taamaattoq nalunaarutiginninnerup tiguneqarnerata kingorna kingusinnerpaamik ulla suliffiusut 3-it iluanni.*

*Imm. 4. Imm. 3 malillugu nalunaarutiginninnerup tiguneqarnerani, communalbestyrelsip nalunaarutiginnineq tiguneqartoq pillugu politiit ingerlaannaq nalunaarfingissavaat.*

*Imm. 5. Kommunalbestyrelsip inuup innarluutilip atugai aarlerinartoqartut nammineq ingerlataminik paasigunigit, imm. 1-4 malillugit communalbestyrelsip iliuuseqartussaatitaanera taamaaqataanik atuuppoq.*

## *Siunnersuisarneq ilitsersuisarnerlu*

**§ 37.** § 6, imm. 2 malillugu inunnut innarluutilinnut aammalu inunnut innarluutilinnut ilaquaasunut kommunalbestyrelse siunnersuisarlunilu ilitsersuisassaaq. Apeqqutaatinnagu inuk innarluutilik Inatsisartut inatsisaat manna malillugu tapersiivigineqarnissamik pisinnaataanersoq, siunnersuineq ilitsersuinerlu pineqartunut tunniunneqartassaaq. Siunnersuineq ilitsersuinerlu ilaatigut ima ingerlanneqarsinnaavoq:

- 1) peqqissaalluni oqaloqatigiinnerit,
- 2) atortorissaarutit ikiuutaasut sorliit qinerneqarnissaannut siunnersorneqarneq, aamma
- 3) atortorissaarutit ikiuutaasut atorneqarnissaannut ilitsersorneqarneq.

*Imm. 2. Imm. 1 malillugu siunnersuineq ilitsersuinerlu Inatsisartut inatsisaat manna imaluunniit inatsisit allat malillugit tapersiissuteqarnermut atatillugu immikkut ittumik pisinnaavoq.*

*Imm. 3. Inuuup innarluutilip aammalu inummut innarluutilimmut ilaquaasut siunnersorneqartarnerat ilitsersorneqartarnerallu pillugit maleruagassanik erseqqinnerusunik Naalakkersuisut aalajangersaassapput.*

## **Kapitali 7**

### *Aalajangiisinjaatitaaneq*

#### *Tapersiisarneq aamma najugaqarfissatut neqeroorut*

**§ 38.** Kapitali 8-imi aalajangersakkat malillugit tapersorsorneqarnissamik imaluunniit kapitali 9-imi aalajangersakkat malillugit najugaqarfissatut neqeroorummi najugaqarnissamik kommunalbestyrelse inummut innarluutilimmut tapersiinissaq pillugu aalajangiissaq. Inummit innarluutilimmit imaluunniit angajoqqaatut sinnisoqarsimaguni sinniisuanit imaluunniit angajoqqaatut akisussasuunit imaluunniit kommunalbestyrelsip nammineerluni qinnuteqarneratigut qinnuteqaammut aalajangiisoqarsinnaavoq.

*Imm. 2. Imm. 1 malillugu aalajangiineq inuuup ataatsip pisariaqartitsineranik pisinnaasaqarnerinillu aalajangersimasumik ataasiakkaatigullu nalilersuineq tunngavigalugu pissaaq. Inuk ataavartumik piginnaanikillisimanersoq kommunalbestyrelsip nalilersuinermini erseqqissassavaa.*

*Imm. 3. § 23 malillugu tapersiinissamik aalajangiisoqartinnagu, inuk innarluutilik taassumalu angajoqqaatut sinnisoqarsimaguni sinniisaa imaluunniit angajoqqaatut akisussasui, kommunalbestyrelsip imm. 1 malillugu oqaloqatigereersimassavai.*

*Imm. 4. Nukinginnartumik tapersiivigineqarnissamik pisariaqartitsisoqartillugu, naak § 23 malillugu oqaloqatigiittoqarsimanngikkaluartoq aamma § 25 malillugu qulaajaanermik suliaqartoqarsimanngikkaluartoq aammalu § 26 malillugu iliuusissanut pilersaarummik suliaqartoqarsimanngikkaluartoq, imaluunniit taakkua naammassineqarsimanngikkaluartut, kommunalbestyrelse immikkut ittumik tapersiinissaq pillugu aalajangiissaq, aammalu immikkut ittumik tapersiineq aallartissallugu. Tamatuma kingorna sapinngisamik piaernerpaamik § 23 malillugu oqaloqatigiinneq aamma § 25 malillugu qulaajaaneq kiisalu § 26 malillugu iliuusissanut pilersaarut kommunalbestyrelsip suliarissavaa naammassissallugulu, aammalu taanna tunngavigalugu pisariaqarpataut nutaamik aalajangiissalluni.*

## *Ingerlaavartumik malitseqartitsineq*

**§ 39.** Kommunalbestyrelsimit tapersiinissaq imaluunniit najugaqarfissatut neqeroorummi najugaqarnissaq pillugu aalajangiisoqareerpat, tapersiinermi siunertaasoq naammassineqarsinnaanersoq ingerlaavartumik malinnaaffigissavaa. Malinnaaneq sapinngisamik inuk innarluutilik suleqatigalugu piissaaq.

*Imm. 2. Ingerlaavartumik malittarinninneq pillugu maleruagassanik erseqqinnerusunik Naalakkersuisut aalajangersaasinnaapput.*

## **Kapitali 8**

### *Tapersiinissamut periarfissat*

*Nammineq angerlarsimaffimmi isumassuinerup isumaginissaanut tapersiisarneq*

**§ 40.** Inummut, inuup innarluutillip nammineq angerlarsimaffimmini najugaqartup ulluinnarni isumassorneqarneranik isumaginnittumut, inuttullu tapersorsorneqarnissamik isumassorneqarnissamillu aningaasaliiffigineqarsimasumut, kommunalbestyrelse aningaasatigut tapiissuteqartassaaq.

*Imm. 2. Imm. 1 malillugu tapersiineq, kommunalbestyrelsip inummik isumassuisumik atorfinititsineratigut piissaaq. Inuup innarluutillip pisariaqartitsinera tunngavigalugu sapaatip akunneranut nalunaaquattap akunnerisa atorfinititsiviusussat amerlassusissai, kommunalbestyrelsip aalajangersassavai.*

*Imm. 3. Imm. 2 malillugu atorfinititsinermi, siusinnerusukkut akileraarut akilertinnagu isertitarisimasat tunngavigalugit inuk akissarsiaqartinneqassaaq. Akissarsiat piffissaq tamakkerlugu atorfinititsinneqarnermut naleqqiullugu, nalunaaquattap akunnerinut innersuussivigineqartunut annikillisinneqassapput. Ukiunut siuliinut isertitarisimasanut upternarsaatissaqanngippat, akissarsiaritinneqartut aallaaviatigut SIK-mut isumaqatigiissut malillugu ilinniarsimannngitsup akissarsiaanut minnerpaamut qaqgukkulluunniit atuuttumut aalajangerneqassapput.*

*Imm. 4. Inunniq inoqtigiaanni ilaangitsunik atorfinititsisoqartussatillugu pineqaatissinneqarsimannnginnermut upternarsaat aammalu naleqqutsillugu meeqlanik pinerliisimannnginnermut upternarsaat piniarneqassapput.*

*Imm. 5. Aningaasarsianut atugassarititaasut naatsorsorneqartarnerannut naleqqussarneqartarnerannullu maleruagassanik erseqqinnerusunik Naalakkersuisut aalajangersaassapput, matumani aningaasarsiat qaffasinnerpaaffissaat atorfinititsitaanermilu atugassarititaasut ilanngullugit.*

## *Oqilisaassineq*

**§ 41.** Ulluinnarni isumassuineq angajoqqaanit imaluunniit ilaqtutanit allanit nammineq angerlarsimaffimmi imaluunniit angajoqqaarsianit isumagineqarpat, kommunalbestyrelse inummut innarluutilimmut oqilisaassinissamik neqerooruteqassaaq.

*Imm. 2. Imm. 1 malillugu oqilisaassineq aatsaat neqeroorutigineqarsinnaavoq:*

- 1) isumassuinermi suliassaq, angajoqqaanut imaluunniit ilaquaasunut allanut isumassuinermit  
isumaginnittunut annertuumik suliaqarnerunermik malitseqartarpat, aamma
- 2) angajoqqaat, ilaquaasut allat ilaqtariilluunniit paarsisartut isumassuinermit  
isumaginniinnarsinnaanissaannut oqilisaassinissaq pisariaqarpat.

*Imm. 3. Imm. 1 aamma 2 malillugit oqilisaassineq § 48 naapertorlugin ulloq unnuarlu neqeroorummiitsinikkut pisinnaavoq. Meeqqanut aamma meeqqat tapersorsorneqarnissaannut Inatsisartut inatsisaanni § 37 malillugu kommunip aaqqissugaanik ilaqtariinni paarsisartuni oqilisaassineq pisinnaavoq.*

*Imm. 4. Inuup innarluutilillip ulluinnarni isumassorneqarnera angajoqqaanit imaluunniit ilaqtutanit allanit nammineq angerlarsimaffimmik imaluunniit ilaqtariinnit paarsisartunit isumagineqarpat, oqilisaassineq pillugu maleruagassanik erseqqinnerusunik Naalakkersuisut aalajangersaasinnaapput.*

#### *Tapersortitut ikiorti*

**§ 42.** Inummut innarluutilimmut, pingaarutilimmik timikkut, tarnikkut, silassorissutsikkut imaluunniit malugisaqarsinnaanikkut piginnaanikillisimasumut, nammineq angerlarsimaffimmik  
nammineersinnaanissamut, najugaqaqatigiffimmik imaluunniit najugaqarfimmik illersugaasumi  
isumaginniinnikkut perorsaasumit tapersorsorneqarnissamik pisariaqartitsisumut, tapersortitut  
ikiortimik communalbestyrelse neqerooruteqassaaq.

*Imm. 2. Inuk innarluutilik, taassuma tarnikkut, timikkut inooqatigiinnikkullu ineriarneranut kiisalu  
ulluinnarni suliassaminik suliaqarnissaanut tapersortitut ikiortip ikiortassavaa, matuman  
angerlarsimaffiu avataani ikiuneq ilanngullugu.*

*Imm. 3. Imm. 1 malillugu aalajangiinermut ilaatillugu sapaatip akunneranut nalunaaquttap akunnerisa  
tapersuinermut atorneqartussat amerlassusisaat communalbestyrelsip aalajangersassavai.*

*Imm. 4. Tapersortitut ikiorti communalbestyrelsimit atorfinitinneqartassaaq.*

*Imm. 5. Tapersortitut ikiortit pillugit maleruagassanik erseqqinnerusunik Naalakkersuisut  
aalajangersaasinnaapput, matuman ilanngullugit:*

- 1) piukkunnassutsinut piginnaasaqarfinnullu piumasaqaatit, kiisalu
- 2) pineqaatissinneqarsimannginnermut upernarsaammik aamma meeqqanik pinerliisimannginnermut  
upernarsaammik piniartarneq.

#### *Nuunnissamut ikorsiissutit*

**§ 43.** Meeqqamut innarluutilimmut angajoqqaatut akisussaasusunut, kommunip iluani najukkap  
nuunneqarnerani aningaasartuutinik matussutissanik, communalbestyrelse aningaasanik tapersiinissamik  
neqerooruteqarsinnaavoq, pisuni makkunani:

- 1) angajoqqaatut akisussaasut maannakkut najugaanni meeqqap tapersorsorneqarnissamut  
isumassorneqarnissamullu pisariaqartitai naammassineqarsinnaanngippata imaluunniit  
ajornakusooruteqarluni aatsaat naammassineqarsinnaappata,
- 2) Inatsisartut inatsisaat manna malillugu tapersorsorneqarnissamut meeqqap pisariaqartitai, siunissami  
najugariligassatut kissaatigineqartumi pitsaanererusumik naammassineqarsinnaappata, aamma
- 3) angajoqqaatut akisussaasut nammineerlutik nuunnissaq kissaatigalugu erseqqisumik oqaatigippassuk.

*Imm. 2. Meeqqamut innarluutilimmut angajoqqaatut akisussaasut nuunnerminni aningaasartuutaannut matusutissanik kommunalbestyrelse aammattaaq aringaasanik tapiissuteqarsinnaavoq, tassani ulloq unnuarlu neqeroorummi inissiinissaq aalajangerneqarpat, angajoqqaatullu akisussaasut illoqarfimmut ulloq unnuarlu neqeroorutip inisisimaffigisaani najugaqarnissaat meeqqamut pitsaanerpaaajussasoq nalilerneqarpat. Piumasaqaatit imm. 1, nr. 1-3-miittut eqqortinneqartussaapput.*

*Inunnut Innarluutilinnut Sullissivimmi Nunamut Tamarmut Atuuttumi piginnaanngorsarneqarneq  
piginnaanngorsaqqinnejnarnerlu*

**§ 44.** Inuup piginnaaneqarnerminik attassiinnarnissaanut tamanna annertuumik pingaaruteqartoq isumaqartoqarpat, Inunnut Innarluutilinnut Sullissivimmi Nunamut Tamarmut Atuuttumi inuup innarluutillip piginnaanngorsarneqarnissaanik piginnaanngorsaqqinnejnarnerlu neqeroorateqarnissaq pillugu communalbestyrelse aalajangiisinhaavoq, matumani piffissami killilimmi najugaqarnissaq ilanngullugu.

**§ 45.** Kommunalbestyrelsit tapersersuineremi iliuusissat suut tunniussinnaaneraat imaluunniit tunniutissaneraat pillugit maleruagassanik erseqqinnerusunik Naalakkersuisut aalajangersaassapput, matumani ilanngullugit:

- 1) inuttut ikiorteqarneq isummersorneqarnerlu,
- 2) Sungiusarneqarneq,
- 3) atortorissaarutit ikuutaasut,
- 4) ingiaqateqartitsineq,
- 5) inigisap aaqqissugaanera,
- 6) qamutit motoorillit,
- 7) ataatsimoortunik angallassinermik aaqqissuussineq,
- 8) aningaasartuutaanerusut,
- 9) Suliffissaqartitsinermut, sammisassaqartitsinermut katerisimaqateqarnissamut neqeroorutit aamma
- 10) pikkorissarneqarnerit ilinniartinneqarnerillu, matumani qanigisaasunut ilanngullugu.

## Kapitali 9

*Najugaqarfissatut neqeroorutit*

*Najugaqaqatigiiffit*

**§ 46.** Inummut innarluutilimmut nunaqqataasunut qanittumiittumi najugaqaqatigiiffimmi najugaqarnissamik kommunalbestyrelse neqeroorateqassaaq, ima pisqartillugu:

- 1) inuk 18-it sinnerlugit ukioqarpat,
- 2) inuup pingaarutilimmik timikkut, tarnikkut, silassorissutsikkut imaluunniit malugisaqarsinnaanikkut piginnaanikillisimanini pissutigalugu ulluinnarni tapersersorneqarnissaq pisariaqartippagu,
- 3) inuk pingaarutilimmik timikkut tarnikkut, silassorissutsikkut imaluunniit malugisaqarsinnaanikkut piginnaanikillisimanini pissutigalugu nammineq angerlarsimaffimmini najugaqarsinnaanngippat,

4) inuk nammineersinnaappat, perorsaanikkut suliassatigullu ikiorneqarnissaq taamaallaat ulluunerani nalunaaquttap akunnerini pisariaqluni, aamma

5) inuup pisariaqtitai najugaqaqatigiiffimmi najugaqarnerani naammassineqarsinnaappata.

*Imm. 2. Imm. 1 malillugu inuup tapersorsorneqarnissamik pisariaqtitsinera nunaqqataasunut qanittumi najugaqaqatigiiffimmiinnermi naammassineqarsinnaanngippat, inuk innarluutilik najugaqaqatigiiffimmi, kommunimi allami inisisimasumi najugaqarnissamik communalbestyrelsip neqeroorfigisinhaavaa. Imm. 1, nr. 1-5-im i piumasaqaatit naammassineqarsimassapput.*

*Imm. 3. Imm. 2 malillugu najugaqaqatigiiffimmi kommunimi allami inisisimasumi inuup inissamik neqeroorfigineqarnissaanut piumasaqaataavoq:*

1) inuk imaluunniit taassuma angajoqqaatut sinniisua akuersisimassasoq, aamma

2) inissap neqeroorutigineqarnissaa sioqqullugu, inuup kommunip angerlarsimaffiani communalbestyrelsip aamma kommunimi najugaqaqatigiiffiup aalajangersimasup taassuma inisisimaffisaani communalbestyrelsip akornanni isumaqatigiissuteqartoqarsimassasoq.

#### *Najugaqarfik illersugaasoq*

**§ 47.** Inummut innarluutilimmum nunaqqataasunut qanittumiittumi najugaqarfimmi illersugaasumi najugaqarnissamik communalbestyrelse neqerooruteqassaaq, ima pisoqartillugu:

1) inuk 18-it sinnerlugit ukioqarpat,

2) inuk pingaarutilimmik timikkut tarnikkut, silassorissutsikkut imaluunniit malugisaqarsinnaanikkut piginnaanikillisimanini pissutigalugu ulluinnarni tapersorsorneqarnissaq pisariaqtippagu,

3) inuk pingaarutilimmik timikkut tarnikkut, silassorissutsikkut imaluunniit malugisaqarsinnaanikkut piginnaanikillisimanini pissutigalugu nammineq angerlarsimaffimmini najugaqarsinnaanngippat,

4) inuk najugaqaqatigiiffimmi neqeroorutigineqarsinnaasut saniatigut, tapersorsorneqarnissamik pisariaqtitsippat, ilanggullugu ulloq unnuarlu tamaat tapersorsorneqarnissamik pisariaqtitsineq, aamma

5) inuup pisariaqtitai najugaqarfimmi illersugaasumi najugaqarnermi naammassineqarsinnaappata.

*Imm. 2. Inuup innarluutillip kommunimi allami najugaqarfimmi illersugaasumi najugaqarnissaa communalbestyrelsip neqeroorutigisinhaavaa, tamanna imm. 1 malillugu nunaqqataasunut qanittumi inuup innarluutillip najugaqarfimmik illersugaasumik pisariaqtitsineranut tapersiinissaq naammassineqarsinnaanngippat. Imm. 1-im nr. 1-5-imut piumasaqaatit suli naammassineqarsimassapput.*

*Imm. 3. Imm. 2 malillugu inuup kommunimi allami najugaqarfimmi illersugaasumi inissinneqarnissaanut neqeroorfigineqarnissaanut piumasaqaataapput:*

1) inuup imaluunniit taassuma angajoqqaatut sinnisaata akuersisimanissa, aamma

2) inuup kommunimi angerlarsimaffiani communalbestyrelsip, kommunimilu najugaqarfiup illersugaasup inisisimaffisaani communalbestyrelsip, inissap neqeroorutigineqannginnerani isumaqatigiissimanissaat.

#### *Inunnut innarluutilinnut ulloq unnuarlu neqeroorummi inissiineaq*

**§ 48.** Inummut innarluutilimmum, ulloq unnuarlu neqeroorummiinnissamut communalbestyrelse neqerooruteqassaaq inuk pingaarutilimmik timikkut tarnikkulluunniit piginnaanikillisimanini pissutigalugu ulluinnarni annertuumik imaluunniit immikkuullarissumik tapersorsorneqarnissamik pisariaqtitsippat

imaluunniit paaqqutarineqarnissamik, isumassorneqarnissamik katsorsarneqarnissamilluunniit pisariaqartitsippat, pisariaqartinneqartullu taakku allatigut naammassineqarsinnaangippata.

*Imm. 2. Imm. 1 malillugu inuk ulloq unnuarlu neqeroorummiittooq siusinaartumik pensionisanik- imaluunniit utoqqalinersianik tigusaqartanngikkuni, aningaasanik kaasarfimmiusanik atisassarsiutissanillu pisinnaatitaavoq.*

*Imm. 3. Aningaasat kaasarfimmiusat atisassarsiutissallu pillugit maleruagassanik ersarinnerusunik Naalakkersuisut aalajangersaassapput.*

*Kalaallit Nunaata avataani najugaqarfissatut neqeroorummi inissiineq*

**§ 49.** Inuup innarluutillip § 46 malillugu najugaqaqtigiiffinni inissinneqarnissaanik, § 47 malillugu najugaqarfimmii illersugaasumi inissinneqarnissaanik, imaluunniit § 48 malillugu Kalaallit Nunaanni najugaqarfissatut neqeroorummi inissinneqarnissaanik kommunalbestyrelse qulakteerinnissaaq, taamaattoq takuu imm. 2.

*Imm. 2. Inuup pisariaqartitai Kalaallit Nunaanni naammassineqarsinnaangippata, Kalaallit Nunaannilu naleqquttumik tapersiinissaq periarfissaqanngilluinnarpat, immikkut ittumik pisoqartillugu Naalakkersuisut akuersiteeqqaarlugit Kalaallit Nunaata avataani najugaqarfissatut neqeroorummiinnissamik neqerooruteqartoqassaaq.*

*Imm. 3. Kalaallit Nunaata avataani najugaqarfissatut neqeroorummiittarneq pillugu maleruagassanik erseqqinnerusunik Naalakkersuisut aalajangersaasinnaapput.*

**§ 50.** Inuk innarluutiminut piginnaanngorsarnissamik pisariaqartitsippat imaluunniit piginnaanngorsaqqinnermik sulinuteqarfingineqarnissamik pisariaqartitsippat, aammalu pisariaqartitsineq Kalaallit Nunaanni naammassineqarsinnaangippat, inuk innarluutilik ulloq unnuarlu neqeroorummi inissikkallarnissaanik, efterskolemiinnissamik imaluunniit Kalaallit Nunaata avataani assingusumi neqeroorummi inissikkallarnissaanik, communalbestyrelse neqerooruteqarsinnaavoq.

*Imm. 2. Kalaallit Nunaata avataani inissinneqarallarnissaq pillugu maleruagassanik erseqqinnerusunik Naalakkersuisut aalajangersaasinnaapput, matumani inissinneqarallarnerup sivisussusissaa ilanngullugu.*

## Kapitali 10

*Inunnik innarluutilinnik ulloq unnuarlu neqeroorummi matoqqasumi inissiisarneq*

**§ 51.** Kalaallit Nunaanni imaluunniit Danmarkimi ulloq unnuarlu neqeroorummi isumannaallisakkami, inunnik innarluutilinnik inissiisoqarsinnaavoq, ima pisoqarnerani:

1) Inuup innarluutillip angerlarsimaffimmii tulluartumi imaluunniit paaqqinniffimmii tigusarininnerup atuutiinnarnissaq pillugu Kalaallit Nunaanni eqqartuussisarnermik inatsimmi § 358, aamma § 361, imm. 2, nr. 3 naapertorlugit Eqqartuussivik aalajangiisimappat.

2) Kalaallit Nunaanni eqqartuussisarnermik inatsimmi § 359, aamma § 361, imm. 2, nr. 3 naapertorlugit inuup innarluutillip angerlarsimaffimmii tulluartumi imaluunniit paaqqinniffimmii tigummigallarneqarnissaq pillugu eqqartuussivik aalajangiisimappat.

3) Kalaallit Nunaannut Pinerluttulerinermut inatsimmi kapitali 32 imaluunniit 33 malillugit pineqaatissiinissaq pillugu eqqartuussivik aalajangiisimappat.

*Imm. 2. Kommunimi inuup innarluutillip tigusarineqarnermini aamma tigummigallarneqarnerani najugaqarfisaani kommunalbestyrelse, pisuni imm. 1, nr. 1-impi pineqartunut ilaasuni, sapinnigisamik piaarnerpaamik, politiinit isumannaallisaanikkut isumannaatsutut nalilerneqartumik, angerlarsimaffiup avataani inissiiffissamik communalbestyrelse pissarsiussaaq.*

*Imm. 3. Inuup innarluutillip tigummineqarallarnermi nalaani kommunimi najugaqarfisaani, pisuni imm. 1, nr. 2-impi ilaasuni, piaarnerpaamik, taamaattoq kingusinnerpaamik nalunaaquttap akunnerisa 72-it iluanni, politiinit isumannaallisaanikkut isumannaatsutut nalilerneqartumik, angerlarsimaffiup avataani inissiiffissamik communalbestyrelse pissarsiussaaq.*

**§ 52.** Kalaallit Nunaanni pinerluttulerinermi inatsimmi § 234 malillugu Kalaallit Nunaanni Pinerluttunik Isumaginnittut aqutsuisi angerlarsimaffimmi imaluunniit paaqqinnifimmi naleqquttumi inissiinissaq pillugu aalajangiippata, inuit innarluutillit ulloq unnuarlu neqeroorummi matoqqasumi inissinnejarsinnaapput.

### Kapitali 11

*Misileraanerit*

**§ 53.** Kommunalbestyrelsit qinnuteqarnerisigut, allaanerusunik tapersiinissaq aamma tapersiinerit allatut ittut tunniunneqarsinnaanerat, kiisalu allatut ittunik najugaqarfissatut neqeroorutinik pilersitsinissaq pillugit Naalakkersuisut akuersissuteqarsinnaapput.

*Imm. 2. Akuersissuteqarnermi misileraanermik aaqqissuussap nakkutigineqarnissaanut aalajangiisinnatitaaneq pillugu aalajangersakkanik Naalakkersuisut aalajangersaasinnaapput.*

### Kapitali 12

*Tikeraarluni angalasarnerit*

**§ 54.** Inuk innarluutilik 18-it sinnerlugit ukiulik nunagisaminut ukiumut ataasiarluni akiliunneqarluni tikeraarluni angalasinnaatitaavoq, piumasaqaatit makkua naammassineqarsimappata, taamaattoq takuuk imm. 3 aamma 4:

- 1) § 13 malillugu inuk najugaqaqtigiffimiippat, § 14 malillugu najugaqarfimmi illersugaasumiippat, imaluunniit § 18 malillugu ulloq unnuarlu neqeroorummiippat, aamma
- 2) najugaqarfissatut neqeroorut inuup nunagisaata avataani inissismappat.

*Imm. 2. Inuk innarluutilik nammineerluni angalasinnaanngippat, inuullu innarluutillip kissaatigippagu, tikeraarluni angalaneq qanigisaasumut ataatsimut arlalinnulluunniit tunniunneqarsinnaavoq, taamaalilluni qanigisaasup qanigisaasulluunniit inuk najugaqarfissatut neqeroorummi najugaqarfisaani tikeraarsinnaaniassammassuk.*

*Imm. 3. Imm. 1-2 malillugit tikeraarluni angalenerit pillugit aalajangersakkat § 49, imm. 2 malillugu inunnut innarluutilinnut Kalaallit Nunaata avataani ulloq unnuarlu neqeroorummiittunut taamaaqataanik atuupput. Taamaattoq imm. 1, oqaaseqatigiit siullit apeqqutaatinnagit, inuk innarluutilik Kalaallit Nunaata avataani ulloq unnuarlu neqeroorummiikkallartoq, nunagisaminut ukiumut 2-riarluni tikeraarluni angalanissumut akiliunneqarnissamik pisinnaatitaavoq.*

*Imm. 4.* Imm. 1 malillugu inuk innarluutilik 18-it sinnerlugit ukiulik, 18-inik ukioqalereerner mi kingorna ukiut 10-it sinnerlugit ulloq unnuarlu neqeroorummiissimasoq, taamaallaat ukiut 2-kkuutaarlugit nunagisaminut tikeraarluni angalasinnaatitaavoq.

*Imm. 5.* Imm. 1, 3 aamma 4 malillugit nunagisaminut tikeraarluni angalanerup ajornakusoornera, ikiortissanik periarfissaqanngin nera imaluunniit nunagisami atortorissaaruteqanngin nera pissutaallutik, ajornarpat, illoqarfimmut nunagisap qanitaaniittumut tunniunneqarsinnaavoq. Tamatuma peqatigisaanik illoqarfimmut tassunga qanigisamut 1-imut qaniganulluunniit arlalinnut angalanermut najugaqarnermullu tunniussisoqarsinnaavoq.

**§ 55.** § 18 malillugu meeraq innarluutilik, meeqqap nunagisaaniunngitsoq ulloq unnuarlu neqeroorummi inissinneqarsimasoq, nunagisaminut ukiumut 2-riarluni akiliunneqarluni tikeraarluni angalasinnaatitaavoq. Meeraq, ukiumi meeqqap 18-nik ukioqalerfiani, marloriarluni tikeraarluni angalanernut akiliunneqarnissamik pisinnaatitaaffeqarpoq.

*Imm. 2.* Meeqqamut pitsaanerpaaajuppat, tikeraarluni angalaarneq angajoqqaatut akisussaasunut imaluunniit qanigisamut 1-mut arlalinnulluunniit tunniunneqarsinnaavoq, taamaalilluni taakku meeraq ulloq unnuarlu neqeroorummi tikeraarniassammassuk.

*Imm. 3.* Meeqqamut innarluutilimmut tikeraarluni angalanermik 1-mik suli tunniussisoqarsinnaavoq, meeqqap angajoqqaatullu akisussaasut akornanni attaveqarnissaq pisariaqartinneqarpat, aamma meeqqap pisariaqartitaanut naleqquppat.

*Imm. 4.* § 49, imm. 2 malillugu meeqqamut innarluutilimmut Kalaallit Nunaata avataanut inissinneqarsimasumut imm. 1-3-mi tikeraarluni angalasarneq pillugu aalajangersakkat atuupputtaaq.

*Imm. 5.* Imm. 1, 3 aamma 4 malillugit nunagisamut tikeraarluni angalanerup ajornakusoornera, ikiortissanik periarfissaqanngin nera imaluunniit nunagisami atortorissaaruteqanngin nera pissutaallutik, ajornarpat, illoqarfimmut nunagisap qanitaaniittumut tunniunneqarsinnaavoq. Tamatuma peqatigisaanik illoqarfimmut angajoqqaatut akisussaasunut imaluunniit qaniganut allanut angalanermut najugaqarnermullu tunniussisoqarsinnaavoq.

**§ 56.** Angalanermut kiisalu ullut unnuallu 9-t tikillugit unnuiffissanut aningaasartuutit inuup innarluutilip kommunimi angerlarsimaffigisaani kommunalbestyrelsip akilissavai. Tikeraarluni angalanerni angalanerup aallartin nera naaneralu ulluni unnuanilu 9-ni pineqartuni ilaatinneqassangillat. Tamatuma saniatigut communalbestyrelsip makku aningaasartuutigissavai:

- 1) § 54, imm. 1, 3 aamma 5 kiisalu § 55, imm. 1, 3 aamma 5 malillugit angalanermut atatillugu tapersiinermut pisariaqartumut, matumani ingiaqateqarneq aamma immikkut ittumik tapersiinernik iliuseqarnerit ilanngullugit,
- 2) angalanerup nalaani ingiaqataasunut, kiisalu ingiaqataasut angerlarsimaffisa aamma najugaqarfissatut neqeroorutip akornanni angalaneq, aamma
- 3) § 54, imm. 2 aamma 5, aamma § 55, imm. 2 aamma 5 malillugit angajoqqaatut akisussaassusillit imaluunniit qanigisat allat tikeraarlutik angalanerannut najugaqarnerannulu.

*Imm. 2.* Inuk innarluutilik Kalaallit Nunaanni najugaqarsimappat, § 54-im i maluunniit § 55-im pineqartunut ilaangippat, taannalu nammieq akilikaminik sulinngiffeqarpat, ingiaqateqarnanilu sulinngiffeqarsinnaanngippat, communalbestyrelsip ullut 9-t tikillugit ingiaqateqarnissaq

ikorsiissutigisinnavaa. Tikeraarluni angalanerni angalanerup aallartinnera naaneralu ulluni unnuanilu 9-ni pineqartuni ilaatinneqassangillat.

*Imm. 3. Imm. 2 malillugu ingiaqataasup angalaneranut- najugaqarneranullu aningaasartuutaasut tamakkiisumik ilaannaasumilluunniit akilerneqarnissaannut ikorsiissuteqartoqarsinnaavoq. Ingiaqataasoq qanigisaasimanngippat, taamatuttaaq makkununnga akiliinissamut ikorsiisoqarsinnaavoq:*

- 1) ullormusianut,
- 2) ingiaqataasup akissarsiassaanut, aamma
- 3) sulinermut atatillugu aningaasarsianut annasanut taarsiissutissanut.

*Imm. 4. Inummut innarluutilimmut 18-it sinnerlugin ukiulimmut taamaallaat ukiut 3-kkaarlugin imm. 2 malillugu ikorsiisoqarsinnaavoq.*

*Imm. 5. Meeqqamut innarluutilimmut ukiut 2-kkaarlugin ikorsiisoqarsinnaavoq.*

*Imm. 6. Imm. 1-3 aamma imm. 2 malillugin naalagaaffeqatigiit avataannut tikeraarluni- aamma sulinngiffeqarnermut atatillugu angalanernut aningaasartuutit kommunalbestyrelsip akilersinnaanngilai.*

*Imm. 7. Tikeraarluni angalanerit aaqqissuunneqartarnerat aamma aningaasartuutit akilerneqartarnerat pillugit maleruagassanik Naalakkersuisut aalajangersaasinnaapput.*

**§ 57.** Inuk innarluutilik, § 54 imaluunniit § 55 naapertorlugu tikeraarluni angalasinnaatitaavoq, aammattaaq qanigisaasup perululluni napparsimancerani, toqunerani imaluunniit ilisaaneranut atatillugu Kalaallit Nunaannut imaluunniit Kalaallit Nunaata iluani angalanermut 1-mut akiliunneqarnissaminut pisinnaatitaavoq.

*Imm. 2. Angalanermut kiisalu ullut unnuallu 9-t tikillugin unnuiffissanut aningaasartuutit kommunalbestyrelsip akilissavai. Tikeraarluni angalanerni angalanerup aallartinnera naaneralu ulluni unnuanilu 9-ni pineqartuni ilaatinneqassangillat. Tamatuma saniatigut kommunalbestyrelsip makku aningaasartuutigissavai:*

- 1) tapersiinermut pisariaqartumut, matumani ingiaqateqarneq aamma imm. 1 malillugu angalanermut atatillugu ikorsiinerit ilanngullugit, aamma
- 2) angalanerup nalaani ingiaqataasunut, kiisalu ingiaqataasut angerlarsimaffisa aamma najugaqarfissatut neqeroorutip akornanni angalaneq.

*Imm. 3. Angalanerit aaqqissuunneqarneri taakkununngalu atatillugu aningaasartuutit akilerneqarneri pillugit maleruagassanik Naalakkersuisut aalajangersaasinnaapput*

**§ 58.** Inuk innarluutilik, § 54 imaluunniit § 55 malillugu tikeraarluni angalasinnaatitaasoq, annertunerusumik nalliuottorsiorpat imaluunniit perululluni napparsimappat, ilaqtuttani qanigisamut 1-imut arlalinnulluunniit Kalaallit Nunaannut imaluunniit Kalaallit Nunaata iluani angalanissamut kommunalbestyrelse tapersiisinnaavoq.

*Imm. 2. Tikeraarluni angalanerit aaqqissuunneqartarnerat aamma aningaasartuutit akilerneqartarnerat pillugit maleruagassanik Naalakkersuisut aalajangersaasinnaapput.*

## Kapitali 13

*Illefimmik angallassineq*

**§ 59.** Inuk innarluutilik najugaqarfissatut neqeroorummi, nunagisap avataaniittumi najugaqartoq najugaqarnermini toqukkut qimaguppat, illerfiup assartornissaanut aningaasartuutit tamakkiisumik ilaannakortumilluunniit matussutissaanut communalbestyrelse tunniussisinnaavoq.

## Kapitali 14

*Allanngortsisarneq atorunnaarsitsisarnerlu*

### *Tapersiisarneq*

**§ 60.** Kapitali 8-mi aalajangersakkat malillugit, inummuit innarluutilimmut tapersiineq allanngortinneqassanersoq atorunnaarsinneqassanersorluunniit pillugit communalbestyrelse aalajangiisinnnaavoq, tapersiinerup inuup pisariaqartitaanut naammassinniffiusinnaajunnaarnera communalbestyrelsip ilisimalerpagu.

*Imm. 2.* § 23 malillugu tapersiinerup allanngortinneqarnissaa imaluunniit atorunnaarsinneqarnissaa pillugit aalajangiisoqannginnerani, inuk innarluutilik tassungalu angajoqqaatut sinniisoqarsimaguni sinniisup imaluunniit angajoqqaatut akisussaasut communalbestyrelsip oqaloqatigisimassavai.

*Imm. 3.* § 26 malillugu tapersiinerup unitsinneqarnissaanik aalajangiisoqannginnerani communalbestyrelse iliuusissanut pilersaarummik suliaqarsimassaaq.

**§ 61.** Kapitali 9 malillugu inuup pisariaqartitai najugaqarfissatut neqeroorutip naammassisinnaajunnaarpagit, inummuit innarluutilimmut najugaqarfissatut neqeroorummiinnerup unitsinneqarnissaa imaluunniit najugaqarfissatut neqeroorummumut allamut nuunnissaa pillugu communalbestyrelse aalajangiissaaq.

*Imm. 2.* Najugaqarfissatut neqeroorummiinnerup unitsinneqarnissaa imaluunniit najugaqarfissatut neqeroorummumut allamut nuussineq pisinnagu communalbestyrelsip qulakkiissavaa:

1) inuup najugaqarfissatut neqeroorummmit angerlartinneqareernerata imaluunniit najugaqarfissatut neqeroorummumut allamut nuunneqarnerata kingorna pisariaqartitaasa naammassineqarnissaannut pisariaqartumik inuup tapersorsorneqarnissaa,

2) inuup najugaqarfissatut neqeroorummmit angerlartinneqareernerata imaluunniit najugaqarfissatut neqeroorummumut allamut nuutinneqarnerata kingorna tapersiinermut § 26 malillugu iliuusissanut pilersaarummik suliaqartoqarnissaa,

3) § 23 malillugu, inuup immaqalu tassunga angajoqqaatut sinniisuata imaluunniit angajoqqaatut akisussaasut oqaloqatigineqarsimanissaat, aamma

4) najugaqarfissatut neqeroorummmit allaganngorlugu oqaaseqaammik piniartoqarsimanissa, taassuma inuup innarluutillip inissinneqarunnaassaguni inissinneqarunnaarnissaanut kiisalu nalinginnaasumik atugarissaarnerata tapersorsorneqarnissamillu pisariaqartitsiinnarnerata killiffi pillugit inissiivigneqarsimasup isummersornera imarissavaa.

*Imm. 3.* Kapitali 9-mi aalajangersakkat malillugit meeqqap innarluutillip najugaqarfissatut neqeroorummiinnerata unitsinneqarnissaa pillugu communalbestyrelsip aalajangiinnginnerani, imm. 2-impiumasqaatit saniatigut, communalbestyrelsip qulakkiissavaa:

1) meeqqap ulloq unnuarlu neqeroorummiinnerata unitsinneqarnissaata siuninnguani kinguninnguanilu meeqqamut, angajoqqaatut akisussaasuinut meerarlu attaveqarfeqarpat attaveqarfinut

tapersiissuteqartoqassappat tapiissutaasinnaasunik piareersaaneq,

2) ulloq unnuarlu neqeroorummiikkunnaarnermut atatillugu meeraq, angajoqqaatut akisussaasut imaluunniit qanigisaasut allat piareersarluarsimanissaat.

*Imm. 4.* Imm. 2, nr. 4 malillugu najugaqarfissatut neqeroorut oqaaseqaateqarsimappat, tassanilu innersuussutigineqarpat inuk najugaqarfissatut neqeroorummiignassasoq, taava najugaqarfissatut neqeroorummiikkunnaarnissap aalajangiiffigineqannginnerani kommunalbestyrelsip § 11, imm. 1, nr. 7 malillugu Inunnut innarluutilinnut Sullissivik Nunamut Tamarmut Atuuttoq oqaaseqaateqaqqullugu piumaffigissavaa. Najugaqarfissatut neqeroorummiikkunnaarnissaq pillugu aalajangiisoqartinnagu Inunnut innarluutilinnut Sullissiviup Nunamut Tamarmut Atuuttup oqaaseqaataata tigunissaa kommunalbestyrelsip utaqqissavaa.

*Imm. 5.* Imm. 1 malillugu najugaqarfissatut neqeroorummiinnerup unitsinnejarnissaa imaluunniit najugaqarfissatut neqeroorummum allammut nuutitsinissaq, inissinneqarnerup unitsinnejarnissaa sioqqullugu minnerpaamik sapaatit akunnerinik 12-inik ilimasaarutigineqassaaq, ima pisooqanngippat:

- 1) Inuup innarluutillip imaluunniit tassunga angajoqqaatut sinniisoqarsimaguni sinniisuata inisisimanerup unitsinnejarnissaa erseqqissumik allakkatigullu akuerisimappassuk,
- 2) inummut innarluutilimmum tunngatillugu mianerisassat ilimasaarinissamut piffissaliussap taassuma sanequnneqarnissaa pisariaqartissimappagu, imaluunniit
- 3) mianerisassat annertuut allat ilimasaarinissamut piffissaliussap sanequnneqarnissaa pisariaqartissimappagu. Aningaasaqarnermut pissutit tunngavigalugit piffissaliussaq sanequnneqarsinnaanngilaq.

*Imm. 6.* Imm. 2, nr. 1-3-imi aamma imm. 3-mi aamma imm. 5-imi aalajangersakkat, inuit innarluutillit, Kalaallit Nunaata avataani najugaqarfissatut neqeroorummiinnerisa unitsinnejarnissaat imaluunniit Kalaallit Nunaata avataani najugaqarfissatut neqeroorummum nuutinnejarnissaat pillugit kommunalbestyrelsip aalajangiinerinut taamaaqataanut atuupput. Inuup innarluutillip kommunimi angerlarsimaffigisaani communalbestyrelse aamma inisisimanerup unitsinnejarnissaa imaluunniit najugaqarfissatut neqeroorummum allamut nuunnejarnissaa pillugu aalajangiisoqannginnerani, Kalaallit Nunaata avataani kommunimi najugarisamit allaganngorlugu nassuaammik piniassaaq.

## Kapitali 15

### Nakkutilliineq

**§ 62.** Kapitali 9-mi aalajangersakkat malillugit inummut innarluutilimmum najugaqarfissatut neqeroorummiittumut, inummut sammititamik kommunimi angerlarsimaffigisami communalbestyrelse nakkutilliissaq. Nakkutilliinerminut ilaattillugu, najugaqarfissatut neqeroorummiinnermi inuup timikkut, tarnikkut inooqatigiinnikkullu pisariaqartitai suli naammassineqarnersut communalbestyrelsip qulakkiissavaa.

*Imm. 2.* Imm. 1 malillugit nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

*Imm. 3.* Naalakkersuisunit qinnuagineqarneq tunngavigalugu, communalbestyrelsip nakkutilliinermik ingerlatsineranut paassisutissat kissaatigineqartut tamaasa nassiunnejarnissaat, communalbestyrelsip pisussaaffigaa.

*Imm. 4.* Imm. 1 malillugu inummut sammititamik nakkutilliinermut maleruagassanik erseqqinnerusunik Naalakkersuisut aalajangersaasinjaapput, matumani ilanngullugit:

- 1) kommunalbestyrelsip nakkutilliisussaatitaanerminik ingerlatsinera,
- 2) nakkutilliinermik aaqqissuussinera,
- 3) nakkutilliisussaatitaanerup naammassineqarnissaanut atugassarititaasut piumasaqtillu, aamma
- 4) kommunalbestyrelsip nakkutilliinermut nalunaarusiamik suliaqartarnera.

**§ 63.** Najugaqaqtigiaffinnut aamma najugaqarfinnut illersugaasunut kapitali 3 malillugu kommunalbestyrelsimit pilersinneqarlutillu ingerlanneqartunut, ingerlatsinermut sammititamik kommunalbestyrelse nakkutilliissaq.

*Imm. 2.* Imm. 1 malillugit nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

*Imm. 3.* Naalakkersuisunit qinnuigineqarneq tunngavigalugu, kommunalbestyrelsip nakkutilliinermik ingerlatsineranut paassisutissat kissaatigineqartut tamaasa nassiunneqarnissaat, kommunalbestyrelsip pisussaaffigaa.

*Imm. 4.* Imm. 1 malillugu ingerlatsinermut sammititamik nakkutilliinermut maleruagassanik erseqqinnerusunik Naalakkersuisut aalajangersaasinjaapput, matumani ilanngullugit:

- 1) kommunalbestyrelsip nakkutilliisussaatitaanerminik ingerlatsinera,
- 2) nakkutilliinermik aaqqissuussinera,
- 3) nakkutilliisussaatitaanerup naammassineqarnissaanut atugassarititaasut piumasaqtillu, aamma
- 4) kommunalbestyrelsip nakkutilliinermut nalunaarusiamik suliaqartarnera.

**§ 64.** Qitiusumik nakkutilliinermik ingerlatsivimmik Naalakkersuisut peqassapput (nakkutilliinermik ingerlatsivik).

*Imm. 2.* Kommunalbestyrelsip Inatsisartut inatsisaanni matumani maleruagassanik ingerlatsineranik allaffissornikkullu aqutsineranik pingaarnertut nakkutilliinermik ingerlatsivik nakkutilliissaq.

*Imm. 3.* § 18-imni aalajangersakkat malillugit ulloq unnuarlu neqeroorutinut pilersinneqarsimasunut ingerlatsinermut sammititamik nakkutilliinermik ingerlatsivik nakkutilliissaq.

*Imm. 4.* Nakkutilliinermik ingerlatsiviup imm. 3 malillugu ingerlatsinermut sammititamik nakkutilliinerminut ilaattillugu, ulloq unnuarlu neqeroorutini pissutsit nakkutigissavai aammalu ulloq unnuarlu neqeroorummik oqaloqateqarneq ingerlatissallugu.

*Imm. 5.* Imm. 2 aamma 3 malillugit nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

*Imm. 6.* ingerlatsinermut sammisumik nakkutilliinerup aaqqissuunneqarnera aammalu imarisassai pillugit maleruagassanik erseqqinnerusunik Naalakkersuisut aalajangersaassapput.

**§ 65.** Nakkutilliinermik ingerlatsiviup pisariaqartumik kinaassutsimut uppermarsaammik takutitsinermigut eqqartuussivimmillu aalajangiivigineqaqqaaangitsumik, paassisutissat kommunip ingerlatsiviata pigisai tamaasa § 64, imm. 2 malillugu nakkutilliinerminni naleqquttuusorisatik takusinnaavaat, tamatumunnga aamma ilaapput paassisutissat inunnut tunngasut mianerisariaqartut kiisalu suliffiu iluani allattugaatigineqartut.

**§ 66.** Nakkutilliinermik ingerlatsivik, § 64, imm. 2 malillugu nakkutilliinermut atatillugu, allaganngorlugu nakkutilliinermut nalunaarusiamik suliaqassaaq tassanilu nakkutilliineq pillugu communalbestyrelsimit najoqqutarineqarsinnaasunik piumasaqaateqassalluni. Nakkutilliinermik ingerlatsivik aammattaaq nakkutilliineq tunngavigalugu communalbestyrelsimit pisussaaffiliisumik makkuninnga peqqusissuteqarsinnaavoq:

- 1) Inatsisartut inatsisaat manna aallaavigalugu communalbestyrelsip § 25 malillugu suliani ingerlanneqartuni sullissinermik qulaajaaneq aallartissaga, imaluunniit § 26 malillugu iliuusissanut pilersaarusiussasoq, taakkulu suliamik suliaqarnermi aallartitsinerit piffissap nakkutilliinermik ingerlatsiviup aalajangigaata iluani naammassineqarsimassapput. Suliaq imaluunniit suliat qanoq ingerlanerat pillugu nakkutilliinermik ingerlatsiviup communalbestyrelsip ataavartumik paasissutissiisarnissa piumasaqaatigisinnaavaat,
- 2) Nakkutilliinermik ingerlatsiviup nakkutilliinerminnut atatillugu naliliippat, suliani pineqartuni communalbestyrelse Inatsisartut Inatsisaanni matumanai aalajangersakkanik malinnissimanngitsoq, communalbestyrelse suliamik naammassineqarsimasumik kingumut aallartitseqqissaq, aamma
- 3) Nakkutilliinermik ingerlatsivimmit nalilerneqarpat suliami ingerlasumi imaluunniit naammassineqarsimasumi najugaqarfissami neqeroorummiinnissaq pisariaqartinneqartoq, tamannali neqeroorutigineqarsimanngitsoq, § 25 malillugu Nakkutilliinermik ingerlatsivimmit piffissaliunneqartup iluani communalbestyrelsip qulaajaaneq aallartissavaa.

**§ 67.** § 64, imm. 3 malillugu ulloq unnuarlut neqeroorummit nakkutilliinermut ingerlatsiviup ingerlatsinermut sammititamik nakkutilliinerannut atatillugu paasissutissat pisariaqartinneqartut tunniunneqarnissaat Nakkutilliinermik ingerlatsiviup pisinnaatitaaffigaa.

**§ 68.** § 64, imm. 3 malillugu nakkutilliinermik ingerlatsiviup nakkutilliinerminut atatillugu ulloq unnuarlut neqeroorummut peqqusissuteqarsinnaavoq. Peqqusutip naammassineqarnissaanut nakkutilliinermut ingerlatsivik piffissaliisinnaavoq.

*Imm. 2. § 64, imm. 3 malillugu ulloq unnuarlut neqeroorutini ataasiakkaani pissutsit taamaattussaatippassuk, annertusisamik nakkutilliinissaq pillugu nakkutilliinermut ingerlatsivik aalajangiisinnaavoq.*

*Imm. 3. Imm. 2 malillugu nakkutilliinermik ingerlatsivik peqqusuteqarpat imaluunniit annertusisamik nakkutilliinissamik aalajangiippat, communalbestyrelsit inissiisimasut nakkutilliinermik ingerlatsiviup nalunaarfigissavai.*

*Imm. 4. Qaqugukkut annertusisamik nakkutilliinermik aallartitsisoqarsinnaanersoq, aammalu qaqugukkut peqqusissuteqartoqarsinnaanersoq pilligit maleruagassat erseqqinnerusut Naalakkersuisut aalajangersassavaat.*

## Kapitali 16

*Inunnut innarluutilinnut siunnersuisooqatigiit, inunnut innarluutilinnut politikki aamma pitsaassusissanut malitassat*

**§ 69.** Kommunalbestyrelse inunnut innarluutilinnut siunnersuisooqatigiinnik pilersitsissaaq. Inunnut innarluutilinnut siunnersuisooqatigiit inunnut innarluutilinnut politikkikkut apeqqutini

kommunalbestyrelsimit siunnersuissapput aammalu innuttaasup aamma kommunalbestyrelsip akornanni najukkami politikkikkut apeqqutit tamaasa, inunnut innarluutilinnut tunngasut pillugit isummersuutinik ingerlatitseqqittassallutik.

*Imm. 2. Kommunalbestyrelsip inunnut innarluutilinnut siunnersuisooqatigiit suliniutit inunnut innarluutilinnut pingaaruteqartut tamaasa pillugit tusarniaaffigisassavai.*

*Imm. 3. Inunnut innarluutilinnut siunnersuisooqatigiit apeqqutit inunnut ataasiakkaanut tunngasut suliarisinnaanngilaat.*

*Imm. 4. Inunnut innarluutilinnut siunnersuisooqatigiinni ilaasortat sisamat aamma arfineq pingasut akornanni amerlassuseqarput. Inunnut innarluutilinnut siunnersuisooqatigiit, kommunalbestyrelsimit aallartitanik, kommunimi imaluunniit allani isumaginninnermut suliassaqarfimmi kommune sullillugu suliassanik attuumassuteqartunik suliaqartartuni sulisunik, aammalu inuit innarluutillit peqatigiiffiinit aallartitanik, amerlaqatigiinnik ilaasortaqaqtillugit katitigaassapput. Kommunalbestyrelse inunnut innarluutilinnut siunnersuisooqatigiinni aallartitaqassaaq.*

*Imm. 5. Inunnut innarluutilinnut siunnersuisooqatigiit pisariaqartumik allattoqarfeqarnermut tunngasunik suliassaataannut kommunalbestyrelse ikuutissaaq.*

*Imm. 6. Inunnut innarluutilinnut siunnersuisooqatigiit suliaqarnerat katitigaanerallu pillugit maleruagassanik erseqqinnerusunik kommunalbestyrelse aalajangersaassaaq.*

**§ 70.** Inunnut innarluutilinnut ataqtigiissumik politikkimik kommunalbestyrelse ilusilersuissaq. Inuit innarluutillit qanoq sullinneqarnissaat naatsorsuutigineqarsinnaanersoq imaluunniit qanoq pisinnaatitaaffeqarnersut pillugit, Inunnut innarluutilinnut politikki paassisutissanik imaqassaaq. Kommunalbestyrelsip qanoq iliorluni inunnut innarluutilinnut tunngasut kommunimi suliassaqarfinni tamani politikkini pilersaarusrorernilu aamma ilanngutsinnissaat qulakkiissaneraa pillugu, inunnut innarluutilinnut politikki paassisutissanik imaqassaaq.

*Imm. 2. Kommunip inunnut innarluutilinnut politikkimik suliaqarneranut inunnut innarluutilinnut siunnersuisooqatigiit kommunalbestyrelsip akuutissavai.*

*Imm. 3. Inunnut innarluutilinnut politikki allaganngorlugu ilusilersorneqassaaq aammalu kommunip nittartagaani tamanut saqqummiunneqassalluni, kiisalu Naalakkersuisunut ilisimatitsissutitut nassiunneqassalluni.*

*Imm. 4. Inunnut innarluutilinnut politikki sivisunerpaamik ukiut sisamakkaarlugit iluarsineqartassaaq.*

**§ 71.** Kapitali 8 malillugu inunnut innarluutilinnut tapersiisarnerup pitsaassusissaannik kommunalbestyrelse aalajangersaassaaq. Pitsaassusissat tapersiinerit ataasiakkaat suussusaasa imarisai, annertussusai ingerlanneqarnissaalu pillugit paassisutissanik imaqassapput. Pitsaassusissat aalajangersagaasut qanoq malinnaavigineqassanersut pillugit, Kommunalbestyrelse aaljangiissaq.

*Imm. 2. Kommunalbestyrelsip Inatsisartut inatsisaat manna malillugu tapersiinerisa tamarmik imaluunniit aalajangersimasumik suussuseqartut piviusunngortinneqarnerannut pitsaassusissanik aalajangersaasoqassanersoq pillugu, kommunalbestyrelse aalangiisinnaavoq.*

*Imm. 3. Imm. 1 aamma 2 malillugit pitsaassusissat allaganngorlugit suliarineqassapput. § 70 malillugu immikkut taamatullu inunnut innarluutilinnut politikkip ilaatut, kommunip nittartagaani tamanut ammasumik saqqummiussisoqassaaq. Pitsaassusissanut malitassat ilisimatitsissutitut Naalakkersuisunut nassiunneqassapput.*

*Imm. 4. Imm. 1 aamma 2 malillugit pitsaassusissat, pisariaqartitsineq malillugu aammalu minnerpaamik ukioq allortarlu, kommunalbestyrelsip iluarsaattassavai.*

*Imm. 5. Imm. 1 malillugu pitsaassusissat ilusaat imarisallu pillugit maleruagassanik erseqqinnerusunik Naalakkersuisut aalajangersaasinnaapput.*

## Kapitali 17

*Aningaasalersuineq aamma akigititanik naleqqussaasarneq*

*Aningaasalersuineq*

**§ 72.** Inatsisartut inatsisaat manna malillugu inunnut innarluutilinnut tapersiinermut aningaasartuutit kommuninit akilerneqassapput.

*Imm. 2. Inatsisartut inatsisaat manna malillugu ulloq unnuarlu neqeroorutit pilersinneqarnerannut ingerlanneqarnerannullu attuumassuteqartut, Naalakkersuisunit akilerneqartassapput.*

*Imm. 3. § 19 malillugu ulloq unnuarlu neqeroorutip ingerlanneqarnera kommunit akigititanik akiliisarnerannit aningaasalersorneqassaaq.*

*Imm. 4. Inatsisartut inatsisaat manna malillugu kommunit tamarmik immikkut namminneq najugaqaqtigiffutiminnik aamma najugaqarfutiminnik illersugaasunik pilersitsinerminnut ingerlatsinerminnullu aningaasartuutistik akilertassavaat.*

*Imm. 5. Inuk innarluutilik Kalaallit Nunaanni oqartussaasut tapersiinissamut iliuuseqarnerisigut Kalaallit Nunaata avataani inissinneqarsimappat, Inatsisartut inatsisaat manna malillugu tapersiinermut aallartinneqartumut aningaasartuutinut atatillugu iliuuseqartussaatitaaneq aamma utertillugit akiliisarneq pillugit maleruagassanik erseqqinnerusunik Naalakkersuisut nunatsinni ingerlatsivinni oqartussat allat isumaqatigalugit aalajangersaasinnaapput.*

**§ 73.** § 48 malillugu inunnut innarluutilinnut ulloq unnuarlu neqeroorummi inissinneqartunut tunngatillugu, kommunit akigititamut akiliuteqarnissaat ulloq unnuarlu inissiinermut ataatsimut aningaasartalerlugu naatsorsorneqassaaq.

*Imm. 2. Ulloq unnuarlu neqeroorut meeqqanut innarluutilinnut § 48 malillugu ulloq unnuarlu neqeroorummi inissinneqartunut kaasarfimmiussanik atisassarsiutissanillu tunniussissaaq.*

*Imm. 3. Imm. 1 malillugu kaasarfimmiussanut atisassarsiutissanullu aningaasartat kommunit akigititamut akiliutaanni ilaatinneqarput.*

*Imm. 4. Akigititamut akiliutissaq imm. 1-imi taaneqartoq pillugu maleruagassanik erseqqinnerusuni Naalakkersuisut aalajangersaasinnaapput, matumani aningaasartuutit suut kommunit akiliutaanni ilaatinneqassanersut pillugu aalajangersakkat ilanngullugit.*

*Imm. 5. Imm. 2 malillugu kaasarfimmiussat atisassarsiutissallu pillugit maleruagassanik erseqqinnerusunik Naalakkersuisut aalajangersaasinnaapput, matumani tunniussisarneq aamma aningaasartat annertussusissaat ilanngullugit.*

*Akigititanik naleqqussaaneq*

**§ 74.** Akigititat Inatsisartut inatsisaat manna malillugu inatsimmi tunngavissinneqartut ukiumut ataasiarluni nalimmassarneqartassapput.

*Imm. 2.* Akigititanik ukiut tamaasa ulloq 1. jannuaari aalajangersaaneq Naalakkersuisut tamanut saqqummersittassavaat.

## Kapitali 18

### *Naammagittaalliorneq*

**§ 75.** Inatsisartut inatsisaat manna malillugu kommunalbestyrelsit aalajangiisarneri isumaginnittoqarfíup aqunneqarnera aaqqissuussaaneralu pillugit Inatsisartut peqqussutaanni aalajangersakkat malillugit isumaginninnermi Naammagittaalliuuteqartarfímmut naammagittaalliuutigineqarsinnaapput.

*Imm. 2.* Inuk innarluutilik imaluunniit taassuma suliами sinniisuitaa, matumani § 24 malillugu illersorti ilanngullugu, naammagittaalliuummik imm. 1 malillugu suliakkiussinissaq pillugu Inunnut Innarluutilinnut Sullissivimmit Nunamut Tamarmut Atuuttumit siunnersorneqarnissamik ilitsorsorneqarnissamillu qinnuteqarsinnaavoq.

## Kapitali 19

### *Aalajangersakkat allat*

#### *Kisitsisit atorlugit nassuaasiorneq*

**§ 76.** Kommunalbestyrelse kisitsit atorlugit nassuaasiani assigisaannillu, Naalakkersuisut piumasarisaannik, nassiussinissamik pisussaaffeqarpooq.

*Imm. 2.* Imm. 1 malillugu kisitsisit atorlugit nassuaasiat assigisaallu nassiunneqartussat, annertussusissaat aammalu taakkua qanoq nutarterneqartassanersut nassiunneqartassanersullu pillugit maleruagassanik Naalakkersuisut aalajangersaasinnaapput.

#### *Pineqaatissiissutit pillugit aalajangersakkat*

**§ 77.** Inatsisartut inatsisaanni matumani aalajangersakkat naapertorlugit kommunalbestyrelsip oqartussatut pisussaaffimi naammassinissaat annertuumik imaluunniit arlaleriarluni sumiginarpagu imaluunniit qarsupippagu, Naalakkersuisut kommunalbestyrelse pinngitsaaliissutinik akilersuinissamik pisussaafflersinnaavaa, matumani ullormut akiliisitsinerit ilanngullugit.

*Imm. 2.* Pinngitsaaliissutinik akilersuisitsinerit Inatsisartut inatsisaanni matumani inatsimmi tunngaveqartut, Nunatta karsianut tutsinneqassapput.

## Kapitali 20

### *Atuutilersitsinermut ikaarsaarnermullu aalajangersakkat*

**§ 78.** Inatsisartut inatsisaat manna ulloq 1. januar 2020 atuutileroq.

*Imm. 2.* Peqatigisaanik innarluutillit ikiorserneqartarnerat pillugu Inatsisartut peqqussataat nr. 7, 3. november 1994-imeersoq atorunnaarsinnejassaaq.

*Imm. 3. Allaffissornikkut najoqqutassiat Inatsisartut peqqussutaanni taaneqartumi imm. 2-imi  
inatsisitigut tunngaveqartumik aalajangersagaasut, taarserneqarnissaasa imaluunniit inatsimmi matumani  
imaluunniit Inatsisartut inatsisaanni allani inatsisitigut tunngaveqartumik maleruagassanik  
aalajangersaanikkut atorunnaarsinnejarnissaasa tungaanut, atuutiinnassapput.*

*Kalaallit Nunaanni Namminersorlutik Oqartussat, ulloq 12. juni 2019*

Kim Kielsen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaquataasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut